


求恕齋  
叢書

今水經注



壬戌仲春



今水經注

余肇康題



南林  
劉氏  
求恕  
齋刊

序

昔黃南雷先生嘗病酈善長注水經多空言而無事實  
爰作今水經條貫諸水窮源按脈由今以溯古卽沿古  
以知今蓋通儒經世之學與酈亭異趨矣黃氏成書於  
康熙之初越今二百有餘歲河屢決黃流改道灤白衛  
河桑乾淮泗汝潁諸水通徙靡常形勢遷貿今昔殊異  
後有作者疏通而證明之補前哲之闕釋後來之疑亦  
不朽業也吳祁甫廣文研精地學數十寒暑終老於平  
陽補松吳丈求其遺書得山海經地理今釋今水經注  
手彙大都零帙斷紙卒不可鯁理丈爲之整比迻錄謀

於承幹承幹既校刊山海經地理今釋繼讀此注北水  
具備南水則闕而未詳丈之言曰吾檢是橐蓋疏一水  
爲一紙或先後凌雜或塗乙難辨乃一一排比審定之  
其爲注也據今日地形水道求合於古百數十年來徒  
變通湮之迹異同離合之故根據明確若指諸掌繁稱  
博引至絜千百言黃氏考古偶疏者閒亦有所糾正雖  
曰闕而未完又奚忍聽其沈霾湮晦飽蟬蠹之腹乎承  
幹大憊之爰并以此注授之手民用副吳丈重愛亡友  
之誼無負廣文窮老著書之苦心廣文同里譚復堂先  
生讀黃氏書稱其脈地志里尋求禹蹟世有山川能說

閱覽博聞以爲之注豈不高出廊大使上廣文稍晚出  
一官海隅埋首纂述性孤介不與時流競聲譽故知之  
者益鮮嚮使復堂見此注當心折駭歎且以爲前賢畏  
後生也歲在辛酉貞元節吳興劉承幹序

今水經注卷一

求恕齋叢書

錢塘吳承志纂

吳興劉承幹校

北水

河水源出吐番朶甘思之南曰星宿海四山之閒有泉  
百餘泓涌出匯而為澤方七八十里登高望之若列星  
故名火敦腦兒

譯言星宿

河水源出今青海玉樹土司境巴顏哈喇山東麓噶

達素齊老山飛泉百道自崖壁上涌出東南流為阿

爾坦河其上源曰羅布淖爾在吐魯番廳西南古勃



澤也亦曰鹽澤又曰蒲昌海或謂之牢蘭海有數大  
源北源曰開都河古敦薨水山海經北山經敦薨之  
山敦薨之水出焉西流注於渤澤出於昆侖之東北  
隅實惟河源董氏祐誠水經注圖說云敦薨水今海  
都河是也西源曰喀什噶爾河曰葉爾羌河古通謂  
之蔥嶺河漢書西域傳河有兩源一出蔥嶺山酈道  
元水經注云河水自蔥嶺分源逕歧沙谷出谷分爲  
二水一水東流逕無雷依耐蒲犁皮山與于闐河合  
北河東北流自疏勒逕溫宿姑墨龜茲墨山注賓樓  
蘭注于渤澤北河卽喀什噶爾河南河卽葉爾羌河

徐氏松西域傳補注云河有三源出蔥嶺者二是也  
南源曰和闐河古于寘河史記大宛傳張騫言于寘  
之西水皆西流注西海其東則東流注鹽澤西域傳  
于闐在南山下其河北流與蔥嶺河合于闐卽于寘  
三源各流數百里納阿克蘇克里雅諸河合爲塔里  
木河至哈喇沙爾城東南匯爲淖爾淖爾袤二百餘  
里承二千里長源之水渟而不流其東南皆戈壁沙  
流無定時有小水上泛成澤西山經云不周之山東  
望勃澤河水所潛也其源渾渾泡泡大宛傳云鹽澤  
潛行地下西域傳云蒲昌海廣袤三四百里其水停

居冬夏不增減皆以爲潛行地下淖爾納受諸水潛  
流地中自周秦至漢並無異說北山經出於昆侖之  
東北隅此昆侖卽巴顏哈喇西南大山東北隅卽噶  
達素齊老謂潛流至此始出也西域傳作出于積石  
彼時昆侖之名移於于寘故變文言之大宛傳天子  
案古圖書名河所出山曰昆侖漢武所名昆侖自是  
于寘南山水經注引釋氏西域記作阿耨達山今日  
大雪山距山經昆侖凡三千餘里西山經昆侖之邱  
河水注焉南流東注于無達海內西經海內昆侖之  
虛河水出東北隅以行其北東南又入渤海又出海

外卽西而北入禹所導積石山兩經所云昆侖皆卽  
北山經之昆侖惟東南傳本誤作西南當從水經所  
據訂正淮南子地形訓河水出昆侖東北陬貫渤海  
入禹所導積石山淮南衍經文改出入爲貫渤海爲  
河水所行大澤甚明圖說云阿勒坦河穿鄂敦他拉  
海而東瀦爲札凌海又東爲鄂凌海折而南逕蒙古  
爾津土司卽經所謂東南流入渤海又出海外也河  
水貫札凌鄂凌二淖爾出海外卽西而北自謂遼阿  
木柰瑪勒占木遜山折東而西折西而北徐堅初學  
記地部引河圖云黃河出昆侖山東北角剛山東以

北流千里折西而行阿木柰瑪勒占木遜山上距噶  
達素齊考天池正千里而遙準以地望古今不殊高  
誘注淮南不知渤海卽本書及北山經所謂海澤誤  
以爲東海之別又據漢武所名昆侖爲于寘南山因  
云渤海大海也河水自昆侖由地中行禹導而通之  
至積石山書曰導河積石入猶出也渤海據尾言積  
石又據首言兩文隔不相應水經知其譌失又附會  
大宛傳安息長老傳聞條文有弱水西王母魚豢魏  
略大秦西有海水海水西有河水之說移昆侖於西  
海以外云昆侖墟去嵩高五萬里河水出其東北陬

屈從其東南流入渤海又出海外南至積石山下有石門又南入蔥嶺山又從蔥嶺出而東北流其源出于闐國南山北流與蔥嶺所出河合又東注蒲昌海又東入塞積石在蔥嶺于寘西北與舊說全別郭璞傳海內西經調停衆家云言海內者明海外復有昆侖山去嵩高五萬里見禹本紀昆侖分海內海外河水亦當從之而分今云入渤海河水出海內昆侖入禹所導積石山河水出海外昆侖河水下流合一昆侖如何分劃爲二禹本紀昆侖去嵩高五萬里據地形訓昆侖虛中有增減九重其高萬一千里百一

十四步二尺六寸或上倍之是謂涼風之山登之而不死或上倍之是謂懸圃登之乃靈能使風雨或上倍之乃維上天登之乃神昆侖去懸圃四萬四千里去嵩高五六千里合併得五萬里大宛傳贊引紀云河出昆侖昆侖其高二千五百餘里日月所相避隱爲光明也其上有醴泉瑤池贊駁元封所名昆侖不及此文蓋以二千五百里以上皆憑算推測非有實指地形訓詳言其數時則訓又云中央之極自昆侖東絕兩恆山西方之極自昆侖絕流沙沈羽西至三危之國昆侖爲中西二極之交距碣石止萬二千里

亦不數增城懸圃傳以虛辭爲實可謂不審北山經  
昆侖河源在泐澤之下如傳說海內昆侖亦須分爲  
二山不然泐澤伏流南出積石豈能還入蔥嶺于賓  
酈氏沿襲郭注於本書所據舊文異同離合俱未根  
考又援誤本淮南注及僞東方朔十洲記晉以後外  
國圖爲證益糾結難解杜佑通典據吐番聘使說斥  
酈注不能詳正是已又謂山經昆侖非河本源仍爲  
傳說所蔽歐陽忞輿地廣記云河水出昆侖自古言  
者皆失其實唐劉元鼎爲吐番盟會使言河之上流  
由洪濟梁西南行二千里水益狹冬春可涉夏秋乃



勝舟其南三百里三山中高而四下曰紫山直大羊  
同國古所謂昆侖者也虜曰悶摩黎山東距長安五  
千里河源其閒劉說見唐書吐番傳較通典爲詳悶  
摩黎山卽山經昆侖西域傳謂之積石者以爲自古  
失之亦目睫之見也舊唐書侯君集傳君集轉戰過  
星宿川至于柏海北望積石山觀河源之所出詳傳  
說君集已先至其地星宿川卽鄂敦他拉柏海今額  
勒蘇池積石非巴顏哈喇山而何唐宋人不知古昆  
侖因并不知漢人所名積石元史地理志載潘昂霄  
所記都實說河源在土番朶甘思西鄙有泉百餘泓

沮洳散渙不可逼視方可七八十里履高山下瞰若  
列星以故名火敦腦兒火敦譯言星宿也東北有大  
雪山名亦耳麻不莫刺其山卽昆侖亦耳麻不莫刺  
其山卽遶阿木柰瑪占木遜山乃山經積石火敦腦  
兒卽星宿川今譯本作鄂敦諾爾都實以其沮洳散  
渙不可逼視指此爲源不復上溯 國朝康熙四十  
三年遣侍衛拉錫往青海始迹得阿爾坦河在鄂敦  
他拉西北尙三百里河源左右諸山總名枯爾坤卽  
昆侖之轉音乾隆四十七年遣侍衛阿彌達再往并  
上源之羅布淖爾得之 御製詩文令兵部侍郎

紀昀等撰爲河源紀略古說以顯經所據乃元志舊

文西鄙改易作南從宋史河渠志而譌悶摩黎山錢

理志云卽大積石山今從提綱大積石山去洪濟梁

無二千三百里之遙也西域傳積石卽巴顏喀喇山

詳具成氏蓉鏡

禹貢班義述

其地在中國西南直四川馬湖府之正西三千餘里雲

南麗江府之西北一千五百里

此據元志注朱思本說惟改馬湖蠻部爲馬湖府明

一統志云元馬湖路屬敘南等處蠻夷宣撫司本朝

洪武四年改爲府

較之昆侖殆爲近焉

此總說元以前諸書所名之昆侖

東北流百餘里匯爲巨澤

巨澤卽札凌鄂凌二淖爾齊氏召南水道提綱作查  
靈鄂靈二海云各周三百餘里元志近五十里匯二  
巨澤名阿刺腦兒自西而東連屬吞噬阿刺腦兒卽  
鄂凌淖爾不云札凌蓋失其名也志又引思本說河  
水從地湧出如井其井百餘東北流百餘里匯爲大  
澤曰火敦腦兒與潘記不同西域傳補注云鄂敦塔  
拉又東南流百三十里瀦爲札凌淖爾又出淖爾東  
南流折而南五十里瀦爲鄂凌淖爾札凌淖爾距星

宿海正百餘里則火敦當爲札凌之誤東北當作東  
南

又東流號赤賓河又東忽蘭水合乞里出河來入之其  
流寢大始名黃河

忽蘭水今呼藍河提綱云源出盛吞池西流環折而  
北而東北有枯得勒古河自東南盤旋來會又北受  
一小水又東百餘里東南流入河元志敘此文云水  
南來名忽蘭又水東南來名也里朮合流入赤賓則  
會合忽蘭之水卽枯得勒古也此經作乞里出涉後  
文而譌宋志亦作也里朮今譯本元志作伊拉齊

又東北分爲九派復合爲一水始渾濁

元志云歧爲八九股名也孫幹倫譯言九渡宋志云  
東北流爲九渡河並無復合爲一水之文李氏兆洛  
皇朝一統輿地全圖自呼藍河以下有小水十數  
流入於河不知孰爲歧出之派

又東行二十日至大雪山名騰乞里塔卽崑崙也

大雪山今阿木柰瑪勒占木遜山卽西山經所云積  
石之山其下有石門河水冒以西流者提綱云元史  
誤指爲崑崙黃河依山南麓東流折而東北至烏藍  
莽乃山下始折而西北流古言河遶崑崙之三面如

玦然實禹貢導河之積石山非崑崙也河圖名此曰

角剛山

繞崑崙之南折而東亦八思河入之

元志注思本曰河過關提與亦西八思今河合亦西

八思今河源自鐵豹嶺之北正北流凡五百餘里而

與黃河合亦西八思今河蓋今西拉流也

又折而北納鄰哈喇河入之

哈喇河出西番白狗嶺北西北流五百餘里入河

又折而西乞里出河入之又西鵬樛河入之

鵬樛河出西番鵬樛

山西流七百餘里入河

乞里出元志注作乞里馬出云源自威茂州之西北

岷山之北水北流卽古當州境正北流四百餘里折而西北流又五百餘里與黃河合此經注文不齊疑傳寫奪之拉錫圖西拉河下有三崑都倫河提綱云三崑都崙河一曰德忒崑多崙出賴杵山西北流三百餘里入黃河卽元史納鄰哈喇河一曰多母達土崑多崙源出納克多母精山西北流屈曲三百數十里入黃河當河流自南轉東北處卽元史乞里馬出河一曰多洛崑都崙源出剛出山西北流二百餘里折西流又三百數十里折而北流百里會東來池泉水西北入黃河正當大河於烏藍莽乃山麓折而西



北流之處卽元史鵬樛河三水溜急而深相距各百  
里土人總名爲古爾板崑都崙河崑都崙卽崑都倫  
一作崑多崙譯文不同爾

過大通城邈水西來入之

邈水出西甯州宿軍  
谷東流五百里入河

宋史地理志樂州舊邈川城乾隆一統志直省地理  
志云碾伯縣宋樂州碾伯在今西甯府東一百二十  
里邈水自其南入河蓋卽今巴燕戎格廳西之克羣  
河也大通城在河州西宋志舊名達南城崇甯二年  
收復改今名元志注云過西甯州貴德州馬嶺不著  
此城蓋其時已廢矣

又東北至陝西河州城又東北逕八十里積石山

又東北逕八十里黃氏璋校云別本無又東二字及  
下逕字今河州城在積石山東南七十里別本是也  
積石山本名唐述山閻氏若據尙書古文疏證引黃  
氏儀云唐儀鳳二年置積石軍於靖邊城始移其名  
張守節史記正義引括地志云小積石山在枹罕縣

西北唐人目此爲小積石山矣

又東北過西甯衛南鳳林河從南來入之

王氏鴻緒明史彙地理志西甯衛東南有大臣城經  
於此始云過衛南自其大略言之也鳳林河在今巴

燕戎格廳東南入河水經注河水又東歷鳳林北又東與離水合圖說云水今日大夏河源出循化廳西南邊外山曰荅蘇爾海阿林水曰和爾臧必拉東流逕廳南又東北流逕河州南折北流逕州東及東北入河

湟水合浩亶河從北來入之浩亶河自甘州經山丹永昌涼州至河州北會湟水入于河湟水源自西番經西甯州南過河州北入浩亶河

漢書地理志浩亶水出西塞外東至允吾入湟水陳氏禮水道圖說云今甘肅大通縣大通河出青海西北境東南流至巴燕戎格廳與湟水合此注云湟水

入浩疊河以大通河源流視湟水尤長也甘州山丹永昌涼州俱據衛外之地言之今大通河自青海東流逕和碩特前左翼頭旗北又東逕和碩特右翼前旗南又東逕和碩特東上旗北又東逕大通縣南又東南逕碾伯縣東平番縣西又東南逕莊浪廳西南碾伯縣東南入巴燕戎格廳境大通以上無逕內地之流

又東過蘭州經靖虜衛北五里金水注之

明史地理志金縣北有大河東北流亂山中入靖虜衛界靖虜衛西南有祖厲河東北有亥刺河皆注於

大河河水先經金縣後至靖虜衛境衛南有祖厲河  
源出會甯安定二縣山中匯納泉流西趨入河金縣  
之水不得越此而北提綱云黃河經金縣北境有水  
自南來注之卽浩尾河也又北流循長城西北至靖  
遠衛南之虎豹口西北有十字河自東合會甯安定  
二縣水及消河西北流注之此經似當云過蘭州金  
水注之又北經靖虜衛南五里會甯水合安定河注  
之也靖虜衛今靖遠縣

過甯夏衛城東南四十里至衛境東北出塞外經沙漠  
三受降城折而南入山西境豐東勝州

宋志黃河東經三受降城豐東勝州折而南此經文  
所本胡氏渭禹貢雖指云河逕甯夏衛東南又北逕  
平羅所東又北逕榆林衛西出塞逕廢豐州西折而  
東逕三受降城南折而南逕廢勝州東入塞又兼本  
此經也豐字或誤作山甯夏榆林二衛今皆爲府平  
羅所爲縣同治輿地圖河自靈州橫城堡西折而北  
逕長城斷處過甯夏縣東至平羅下省嵬口東北流  
出塞入鄂爾多斯右翼中旗界又東北逕後旗界李  
氏兆洛歷代地理志韻編今釋云唐豐州地河循色  
爾彌哈拉山西麓至白塔東歧分爲二西派注騰格

里鄂謨提綱云卽古窳渾之屠申澤也河出鄂謨東  
北會阿爾坦河又東北爲庫庫鄂謨折東流與東河  
會東派於庫庫鄂謨南又別爲二支一支逕後旗北  
水經注圖說卽古南河一支又逕其北水經注無此  
河兩河相距八十里河行兩枝渠北吳氏熙載通鑑  
地理今釋云五受降城在河北岸水經注河水又屈  
而東流爲北河東逕高關南又東逕臨河縣故城北  
圖說云高關今阿爾坦山元和郡縣志西受降城漢  
臨河縣故理蓋臨河兼有北河地也故城當在兩河  
之間按李吉甫志云西受降城在豐州西北八十里

蓋漢朔方郡地臨河縣故理處如李說城卽臨河舊址圖說分別言之者以受降三城俱在河北臨河在北河南於地形似不相合詳志文自云故理又東南距豐州里數甚明若移置北河以北距南河已百里而遙焉得至豐州反近止八十里通典云豐州西至黃河百三十里北至黃河四十里東北至黃河八十里以是推之西受降城自在兩河之間唐書張仁愿傳云河北者河流代有遷徙唐時故道與北魏時不同今之河道與唐時又不同耳錐指地理今釋俱混言南北考之不審元和志又云西受降城開元初爲



河水所壞十年總管張說於故城東別置新城今城西南隅又爲河水所壞城東尙有新城亦名西受降城今悉無跡河東逕翁金碩隆山南又東分流復合至噶札爾和碩南大漢得兒山西南折東南流又分而合合而復分至烏喇特旗西墨爾楚克賀邵山北折西南流枝河合西分一渠來會又西南南河亦來會三流合爲一東南流五十里折東流河曲南直榆林懷遠縣張仁愿傳云中城南直朔方朔方今懷遠也錐指圖中受降城在北河東逕巴爾朱海城南又東逕謨爾根嶺南崑都崙河自北來注之又東逕茂

明安旗南鄂爾多斯左翼後旗北地理志韻編今釋  
云唐勝州地通典勝州東至黃河四十里北至黃河  
五里西北至黃河二十里勝州東北濱河樂史太平  
寰宇記云勝州正北至黃河五里去東受降城八里  
元和志云東受降城在榆林縣東北八里榆林隸勝  
州郭下是勝州渡河三里卽東受降城今河自蝦蟆  
兒拜商東會蘇爾哲河又東會邁達里河東受降故  
城宜在兩河之間胡三省通鑑注東受降城在勝州  
東北二百里據寶秣後徙置而言唐書地理志云寶  
秣元年振武節度使張惟清以東城濱河徙置綏遠

烽南城徙東北百九十里故二百里也元史地理志  
東勝州下云唐徙東受降城於綏遠烽南卽今州治  
韻編今釋東勝州今歸化城西南一百四十五里東  
受降新城於元爲東勝州治注文東北當作東南或  
志說有誤河東逕西拉德布色克山南入歸化城薩  
拉齊廳境李氏兆洛地理沿革圖遼豐州地河東會  
圖爾根河轉東南流提綱云過古東勝州境稍折而  
東而南至湖灘河朔渡口卽古君子津東勝在圖爾  
根河南西岸爲左翼後旗接前旗界河東南會烏藍  
木倫河逕前旗東清水河廳西又南卽平魯縣邊墻

外地矣儲氏大文河套志序云河套袤二千里明時  
圖志亡佚故也

歷廢武州西北二百五十里過延安府綏德州境東

河自偏關縣老牛灣堡西流入長城洪氏亮吉乾隆  
府廳州縣圖志云偏關縣五代北漢置偏頭寨金屬  
武州元改砦爲偏頭關明成化二年置偏關所又神  
池縣下云後周神武縣遼復置并置武州經云廢武  
州據遼金元言也一統志表平魯縣金武州甯遠縣  
北境是平鹵衛武州所轄兼有長城外地明志橐繫  
平虜衛於大同下云西有大河又繫偏頭關於曲河

下云北有關河西北流入大河據明立文當云河曲  
或平虜衛偏關所矣

吃那河合奢延水自河套北來入之

吃那河自宥州東南流至夏州奢延

水西來入之又東流逕銀州入綏德州境東南流入於河

水經注有奢延水黑水元和志夏州朔方縣云州南  
無奢延水唯無定河卽奢延水也烏水出縣黑澗東  
注奢延水本名黑水烏水卽吃那河提綱云無定河  
有二源西源曰額圖渾河古奢延水也出河套右翼  
前旗賀道圖山東入懷遠堡邊城爲恍惚都河又折  
東北至波羅營與北來海留圖河會海留圖卽東源

古黑水也亦名吃那河出前旗虎喇虎之地與西北  
來之納林河及西喇烏蘇河會東南入榆林邊兩源  
既合爲無定河自榆林南東南流經米脂西南又東  
南入綏德州境經以源出塞外故舉古州表之

河水又南流逕延川縣東延水入之

延水源出延安府安塞縣西北蘆關

嶺東南流入膚施縣境逕延長縣入於河河水又南逕石州甯鄉西入平陽

府境逕石樓永和大甯縣

乾隆府廳州縣圖志永和縣黃河自汾州府石樓縣  
南流入縣西七十里與延川縣對岸錐指云東南逕

綏德州東其東岸則臨縣永甯州甯鄉縣又南逕清

澗縣東又南逕延川縣東又南逕延長縣東其東岸則石樓縣永和縣大甯縣經先延川延長後石州甯鄉石樓非其次也明志萬秭二十三年改石州曰甯甯州又云汾州府石樓本屬隰州萬秭二十四年改屬經所據亦李賢等明一統志舊文

洛水西來入之

洛水源自慶陽府界東南流逕鄜州同官過朝邑縣南東入河

錐指云洛水逕朝邑縣西之朝坂南自趙渡鎮歷華陰縣西北葫蘆灘入渭明成化中改流東過鎮南逕趨於河畢氏沅山海經新校正云考阜昌禹跡圖石刻已在同州南入河則宋金時改流也漢志水道圖

說云北地郡歸德洛水出北蠻夷中入河左馮翊襄  
德洛水東南入渭云入河又云入渭者其正流入河  
又自今朝邑縣分一派東南流入渭也說文云洛入  
渭其時入河一派已塞今入渭一派復塞而入河一  
派復通蓋二派互爲通塞矣

涑水西流入之

涑水源出絳縣爲絳水逕聞西夏縣  
安邑猗氏臨晉至蒲州入於黃河

顧氏祖禹讀史方輿紀要云涑水在蒲州東十里有  
孟盟橋其上流卽絳水趙氏一清水經注釋云觀道  
元注絳水出絳山下流入澮澮入汾汾入河不與涑  
水合也狄氏子奇國策地名考箋云今絳水與涑水



合西南流直達大河不由澮分與古道不同

又東逕孟縣南又東逕洛陽北洛水從南來注之河水  
又東逕鞏縣北溫縣南過汜水縣北濟水從北來注之  
鄭樵通志地里略河水東爲孟津又東過河陽縣南  
洛陽縣北又東過溫縣溟水從西北來入焉又東右  
過鞏縣洛水從西南來入焉左過成皋縣北沔水從  
北來入焉成皋今孟州汜水此經純襲彼文惟移洛  
水於洛陽之次爲異下經云洛水過鞏縣東又北入  
于河與鄭符合疑此文本作溟水從西北來注之因  
溟字或本作沮或又作沮懸而未定後人不知誤刪

其句而以下文洛水補之爾濟水在汜水縣北入河  
據今廣濟河而言水經亦載兩濟口濟水下云鞏縣  
北河水下則云成皋縣北酈氏始合爲一蓋東渠至  
元魏時已絕今復通矣通志略于沔水條云至鞏成  
皋閒入河失未分析又此條敘孟津于河陽洛陽之  
上與水經注不同未詳其據經作孟縣據今地立文  
洛陽自在孟縣西南不得先孟縣後洛陽也

至武陟縣東沁水從北來注之河水又東過中牟縣北  
汴水入焉

漢志沁水至滎陽入河圖說云漢時沁水自今武陟

縣又東流至今滎澤縣其時河水過此沁水於此入

河水經河水過武德縣東沁水從西北來注之與今地符合沁水篇又云至滎陽縣北其時蓋亦有兩

口也武陟以下河流屢易經所著皆後徙之迹中牟汴水說具下經

河水逕開封府至兗州府曹縣界分爲二派其一東北

流過濮州境東南六十里同北清河一名會通河合衛以入

海其一東南流至徐州同南清河一名泗由淮以入海

宋志熙甯十年河道南徙東匯于梁山張澤灤分爲

二派一合南清河入于淮一合北清河入于海凡灌

郡縣四十五遣使修閉朱子語錄云看劉樞家中原

圖黃河卻自西南貫梁山泊迤邐入淮來南北兩宋

河決俱自梁山張澤樂分入南北清河經云至曹縣  
界所據乃元明河道也元初河勢南趨至元二十六  
年開會通河北派已微至正四年決自茅金隄始徙  
而北漕運使賈魯議挽河東行十一年開河故道自  
黃陵岡引河入淮於是復分二派紀要云賈魯河自  
黃陵岡南經曹縣梁進口下通歸德丁家道口萬氏  
斯同明代河渠考舊河自虞城達蕭縣北冀門集出  
徐州小浮橋所謂賈魯故河此南派東南流至徐州  
達南清河之道俞氏正燮癸巳存稟云賈魯河由黃  
陵岡徑祥符地歷曹縣濮州鄆城汶上壽張陽穀地

復至壽張沙灣之積水閘入會通河此北派東北流  
過濮州境達北清河之道明世兩派迭爲微盛下經  
附記云河舊在開封府城四十里東至虞城下達山  
東濟甯州界洪武二十四年決原武黑陽下東逕府  
城北五里又東南至項城縣出境入淮正統十三年  
又決滎陽縣東逕府城西南又東南逕陳留自亳入  
渦口又逕蒙城至懷遠入淮南道屢移明志正統十  
三年潰壽張沙灣明年置分水閘設三空放水自大  
清河入海宏治三年又自東平北至興濟鑿小河十  
二道入大清河及古黃河以入海北道亦屢移至宏

治八年築塞黃陵岡及荆隆等口北流始絕南派專  
行矣邱濬大學衍義補云自宋以前河自入海元人  
排河入淮東北之道猶微有存焉者今則以一淮受  
衆水之歸無涓滴之滲漏邱書進於成化二十三年  
前大行堤之築九年曹濮之流塞而後通蓋河不兩  
行時合時分經據其分不據其合者以一統志爲主  
也今河又自蘭儀北出長垣東明入曹濮合魏河貫  
壽張東河南派復絕水經注圖云咸豐五年銅瓦廂  
決大河北流由大清河入海與正統中北決之道合  
與此經全不相合矣

興也縣全不...

...

...

...

...

...

...

...

...

今水經注卷一

黃河圖又限到等口此謂城隍南邊

今水經注卷二

錢塘吳承志纂

吳興劉承幹校

北水

汾水至平遙介休過汾州城東二十五里南入平陽府境

紀要云汾水入汾州府平遙縣界經西及汾州府東又南經孝義縣東介休縣西入平陽府霍州靈石縣境經先平遙後汾州亦誤

歷襄陵太平之東過絳州稷山河津北過滎河西注於



河

提綱云汾水於平陽西北分爲二派一南流稍西經襄陵縣城東一西南流支渠如織經城北及城西曲而東南復合經云歷襄陵東不數西流一派也過絳上別本有南字據下文云北過滎河此文自當云南過絳州稷山河津今本傳寫脫之汾口在龍門南五十里明志云河津汾水舊由滎河縣北睢邱入河隆慶四年東徙經縣西南葫蘆灘入河

涓水源出臨洮府涓源縣西二十五里南谷山至烏鼠山下轉而東流

提綱渭水源出渭源縣西鳥鼠山一名青雀山南北  
兩源北源發北麓分水嶺東南流經縣城北又東稍  
南南源水自城西南東北流會焉南源出鳥鼠山南  
麓大樹下南谷山卽北麓支峰也錐指云縣志鳥鼠  
山在縣西二十里南谷山在縣西二十五里鳥鼠與  
南谷相去才五里當是一山後人強生分別耳經云  
出南谷不云出鳥鼠者用林之奇尙書詳解之說許  
君說文解字云渭水出隴西首陽渭首亭南谷東南  
入河杜林說夏書以爲出鳥鼠山許以杜說爲別一  
義則漢人已先有此說矣

至華陰界沮水北來注之

沮水來自延安宜君縣至耀州富平縣合漆河漆河源出

扶風古漆縣西北逕同官縣至耀州南同沮水至同州朝邑縣東南入于渭

蔡沈書集傳漆水寰宇記自耀州同官縣東北界來

經華原縣合沮水沮水地志出北地郡直路縣東今

坊州宜君縣西北境也寰宇記沮水自坊州昇平縣

北子午嶺出俗號子午水下合榆谷慈烏等川遂為

沮水至耀州華原縣合漆水至同州朝邑縣東南入

渭經注本之惟增入漢志漆縣之說寰宇記有兩沮

水一出昇平縣北一在華原之邠州入縣界合漆水

入富平石川河傳合為一以水經注言沮水自直路

縣東南逕宜君川南出土門山西也程大昌雍錄沮  
水者長安志曰自邠州東北來至華原縣南流乃合  
漆水入富平縣石川河石川河沮水正派也漆水者  
長安志曰漆水自華原縣東北同官縣界東南流入  
富平縣石川河程據宋敏求志推考沮源不及昇平  
其時兩流已別提綱載昇平沮水云出中部縣子午  
山俗曰沮河經縣城南又東稍北三十餘里入洛河  
載華原沮水云出耀州西北境之分水嶺經州城西  
南又東南漆水自東北來會至富平縣交口鎮北與  
澗化河合入渭二水各自爲派尋水經注文沮水夾

山西流當自今宜君水逆流入玉華川出杏頭鎮漢志水道圖說云北地郡直路沮水出中部縣西境耀州沮水非此沮水是也富平下流雍錄言至同州白水縣與口所注分爲二水一水經鄭渠東逕粟邑故城北水道不殊今二水合注交口鎮不至白水不知始於何時錐指云鄭渠堙廢沮水不復東入洛鄭渠堙在宋前此流之絕宜在金元以後紀要明史稿俱仍此經蓋以方志沿襲未改至錐指出明辨皙矣漆水出宜君縣南大神山扶風之漆在今永壽縣境別爲一水孔穎達尙書正義分涇東涇西二漆至確不

易通志略漆水出鳳翔普潤縣東或云出岐山經華  
原縣與沮水合注文襲彼而誤永壽之漆無流至同  
官之理涇水橫絕姑置不言本經沮水在耀州西繞  
越而東不能以自解也

涇水源出平涼府界笄頭山逕涇州又東南至邠州北  
界馬蓮河從北來注之

笄頭山在今平涼府西南四十里漢志作并頭山或  
亦作雞頭涇水出其東南麓馬蓮河古泥水源出慶  
陽府東鐵角城東北二山流逕府城南合環水環水  
出環縣東北興隆山元和志慶州順化縣隋置合水

縣在馬領白馬二水口寰宇記安化縣白馬水出北  
塞夷中水經注云洛水南經尉李城東北合馬嶺水  
號白馬水說文注云馬蓮卽馬嶺之轉語

洛水源出陝西商縣西北一百二十里謹舉山

中山經謹舉之山洛水出焉新校正云山在今陝西  
雒南縣西北地里志云上雒禹貢雒水出冢領山今  
方志云冢領卽謹舉也山在今商州西北一百二十  
里入雒南縣界

澗水從北來注之

澗水源出灑池縣東北二十三里白  
石山東流逕新安洛陽東南入于洛

今澗河下流合穀水至洛陽縣西南注于洛漢志新

安禹貢澗水在東南入雒水道圖說云此水水經注  
已云未詳今河南新安縣西西有一水或以爲澗水  
然其水入穀與志不合也

又東北過鞏縣東又北入于河  
明志鞏西北有洛水舊經縣北入河謂之洛泐亦曰  
洛日嘉靖後東過汜水縣入河又汜水下云北濱河  
洛水自西東至滿家溝合汜水入焉按宋志元豐二  
年引伊洛水入汴河自汜水關北開河五百五十步  
屬於黃河其時新口已開至明中葉舊口盡失經不  
言汜水疏也



濟瀆

通典云濟水因王莽末旱枯涸但入河而已不復截  
流而南水經乃云南過滎陽武封邱寃句乘氏等  
縣並今縣地一依禹貢舊道斯不詳之甚又云今東  
平濟南淄川北海界中有水流入于海謂之清河實  
蒗澤汶水合流而曰濟河蓋因舊名非本濟水也元  
和志寰宇記並承其說黃度尙書說云濟水雖絕其  
瀆猶在經文本之

至溫縣南入于黃河

提綱沅水經濟源縣城北又東分爲二派一經柏香

鎮之南東南流入河一東經鎮北又東曰豬龍河經  
府城南境又東經溫縣北境又東南至武陟縣南之  
澗溝村入河豬龍河卽廣濟河上經河水過汜水縣  
北濟水從北來注之據此河也明志溫西南有濟水  
舊自濟源縣流經沅河鎮南注于河後其道盡入河  
中沅河鎮之流卽柏香鎮南渠所注與此經合兩渠  
並見水經郝氏懿行爾雅義疏云沅水今至武陟縣  
入于河則以北渠爲經流矣雖指據懷慶府志云溫  
縣故道盡陷河中濟水唯從枝津之合溟水者至孟  
縣東南入河與兩派俱異溟水今溟河上流納濟枝

津下流並不合一志說所不詳也

與河合流又東過成皋縣北又東過滎陽縣北

此仍水經舊文成皋上經作汜水

濟水又東過原武又東北流過陽武縣北濟水又東逕  
封邱縣北爲北濟過封邱縣南爲南濟北濟又東逕開  
州又東北過壽張縣西界安民亭南汶水從東北來注  
之濟水又東北流逕東阿縣界又東北入濟南府界逕  
長清齊河厯城濟陽齊東武定青城濱州蒲臺利津諸  
州縣界入于海

漢志水道圖說云水經濟水東出過滎澤陽武封邱

平邱濟陽宛胸定陶乘氏入鉅野澤又過壽張須昌  
穀城臨邑盧臺菅梁鄒臨濟利中下邑入于河酈注  
云河水枝津注之又東北入海以今地考之自滎澤  
縣軼出東流過陽武縣封邱縣直隸長垣縣河南蘭  
儀縣今黃河所行其故瀆也又過山東荷澤縣已湮  
又過定陶縣鉅野縣壽張縣今趙家河入運河蓋其  
故瀆又過東平州東河縣長清縣歷城縣章邱縣今  
大清河其故瀆也又過鄒平縣已湮又過高苑縣博  
興縣今小清河其故瀆也自博興縣入海之瀆已湮  
蓋在今大清河之南小清河之北也此經歷城以下

別據于欽齊乘故與水經不同濟陽齊東武定青城  
濱州蒲臺利津並大清河所行之道雖指引黃氏儀  
說爲潔水舊渠宋時河行潔瀆河去大清兼行河潔  
二瀆非古濟渠魏氏源書古微云小清河爲濟水故  
道濟本由此入海後徙於潔今日之大小清河皆謂  
之濟可也如魏氏說經據齊乘不誤今大清河復爲  
河奪則定陶以北散出之濟亦與河水並流入海矣  
北濟分於陽武見酈注圖說不具今從闕焉汶水說  
具下經

南濟又東過曹州境又東過定陶縣南又東過金鄉魚

臺縣南東入于泗

水經濟水至乘氏縣西分爲二其一水東南流過乘氏縣南又東過昌邑縣北又東過金鄉縣南又東過東緡縣北又東過方與縣北爲蒗水蒗水又東過湖陸縣南東入于泗水漢志濟陰郡禹貢蒗澤在定陶東山陽郡湖陵禹貢浮于淮泗通于河水在南水道圖說云蒗澤蓋今夏月湖也通于河河卽蒗澤水今夏月湖東流曰萬福河至魚臺縣爲昭陽湖蓋其故瀆也昭陽湖卽泗水所匯今運河貫其中卽上下經所云南清河矣夏月湖出定陶西北金堤集上流已

涇

汶水其源有三

元和志乾封縣界有五汶皆源別而流同錐指云五汶者北汶羸汶柴汶牟汶其一則經流也水經注無羸汶止四汶經據明一統志別出小汶則三汶矣注釋據泰安圖志增入石汶石汶今董家河古流合北汶今自爲派入汶蔣氏廷錫尙書地理今釋云汶源非一析而言之當有五源也又小源五六不在此數一發濟南府城南七十里太山之旁仙臺嶺今泮河也錐指云源出泰山分水嶺卽北汶水經注

北汶水出分水谿源與中川分水濟水篇注中川水  
出山在縣之分水嶺谿山在隋入歷城分水嶺卽仙  
臺矣漢志泰山郡萊蕪原山禹貢汶水出明志彙以  
爲別源據書集傳汶北汶也齊乘云入濟之汶書傳  
謂之北汶蓋原山汶水宋世別有北汶之名後人與  
分水谿混而爲一因以汶水正源移之仙臺水經注  
釋云考泰安圖志羸汶與牟汶合流至泰安縣東北  
之故縣鎮與出仙臺嶺水會又西南流與石汶合又  
西南流與北汶合此仙臺嶺在石汶東北卽原山西  
麓原山亦名仙臺近又謂之分水嶺兩源相糾所由



來也

一發萊蕪縣東五十里原山之陽

淄水出原山之陰

一發萊蕪

縣寨子村

原山一名岳陽山在今博山縣東南二十五里去萊蕪縣八十里汶水有二源出西南兩麓出南麓者自碁山西北西南流逕萊蕪城北又西南會縣南諸水古爲牟汶別源後魏移嬴縣於南因又名嬴汶今通謂之汶水出西麓者自分水嶺西西南流逕士子口會北山諸水卽漢志與淄水同出水經西南過嬴縣南之汶源今俗謂之會河二水至范家集合而爲一

牟汶凡三源二源出萊蕪東南一自海眼泉西流出  
盤龍莊水經注所謂汶出牟縣故城西南阜下也一  
自宮山北流與海眼泉水合又西會羸汶水水經注  
牟汶逕奉高縣故城西南流注于汶牟汶兼南北  
兩源言奉高在今泰安縣東十七里故城當去范家  
集不遠元和志乾封汶水源出縣東北原山唐時分  
水嶺入乾封境是以其說如此王存元豐九域志奉  
符有汶水萊蕪有羸汶水牟汶水萊蕪境內止有牟  
羸二汶分別尤明寰宇記通志略兼表古今兩存萊  
蕪乾封之迹書集傳不知其異乃云汶水出泰山郡

萊蕪縣原山今龔慶府萊蕪縣也淄水出原山之陰  
汝水出原山之陽西麓正源遂移於南麓一統志旣  
從俗說以泮河爲經流兩麓俱爲旁源不復深考寨  
子村一名據流合牟汶者言之并牟汶正源亦不能  
詳矣紀要萊蕪汶水在縣南二十里其上源一出原  
山一出寨子村以一統志爲據與此經同雖指駁縣  
志寨子村水爲浯汶之說於原山略無所辯又以宮  
山北水爲嬴汶則嬴汶在牟汶之南與水經注所云  
牟汶出牟縣故城西南柴汶逕柴縣故城北及泰安  
圖志嬴汶自萊蕪縣東北流逕縣西南諸說全不相

合提綱始著會河之目乾隆府廳州縣圖志定爲汝水經流水經注圖又據注釋系仙臺嶺於原山之下其迹乃顯惟提綱於汝水正源及羸汝尙從錐指之說圖志雖以汝水之名還之會河而羸汝仍從提綱注圖悉改其次又并宮山移之牟汝之北俱所不解蓋傳說歧誤已久諸家所訂亦互有得失也

至泰安州靜封鎮合焉名曰塹汝

錐指泮水州志謂之塹汝水經注釋云羸汝與牟汝合流至泰安縣東北之故縣鎮與出仙臺嶺水會名曰大汝亦曰塹汝東樵以北汝爲塹汝非也經以爲

羸牟二汶合北汶名塹汶與注釋又不同靜封鎮明志作靜豐尙書地理今釋作靜安

西南流與泰安州東南四十里徂徠山陽之小汶河合水經注釋云小汶水出新泰縣東北龍堂山西流百二十里入泰安縣東南境至縣西南逕徂徠山南故柴城北合於大汶尋其川脈卽古柴汶之道柴汶本出梁父縣東西流逕陽關城南西合於汶水今梁父縣東之上源已絕下流僅至古柴城蓋水道有移易提綱乾隆府廳州縣圖志並以董家河爲柴汶誤也逕甯陽平陰汶上縣界又西至東平州界注於大清河

明志汶上西爲南旺湖汶水在東北舊時西流入大清河永樂中開會通河堰汶水西南流悉入南旺湖經不云戴村壩據未堰以前言也說文注云明會通河及國朝運河皆全資汶水入洌之故道湮矣今惟沙河自壩下潛出入大清河

大清河卽濟河之故道蓋濟水伏流不見故惟汶水由濟以入于海

此釋通典之說自戴村築壩東平以北已無汶水可言大清河屢爲河奪徙後仍爲巨川足證濟水寔有潛出之流錐指申杜說云清河賴諸山泉溝澤以成

其川實則厯城以上山泉溝澤止有數派其流甚微不能成川也

沁水源出山西沁州沁源縣北一百里綿山東谷

經謁戾之山沁水出焉漢志穀遠羊頭山世靡谷沁水所出元和志云縣上縣羊頭山一名謁戾山在縣東北五里說文注引戴氏震云山在今武鄉縣西百二十里西北接祁縣平遙縣西南接沁源縣一名麓臺山迤邐而西爲縣山

達濟源河

河當作縣

逕武陟入于河

漢志作至滎陽入河說具上經明志云其支流自武  
陟紅荆口經衛輝入衛河明初黃河至滎澤趨陳潁  
徑入于淮不與沁合入衛之故道堙矣

汴水源出滎陽大周山合京索須鄭四水

須水源出滎陽縣方山北

流入汴索水源出滎陽小徑山北流入京水京水源出嵩渚山逕鄭州西南十五里東北入鄭水鄭水源出鄭州城東二十五里東北至中牟縣下入于汴

汴水今小賈魯河上流本首受黃河今河渠絕首受

索河明一統志云源出大周山據索水言也水經濟

水注索水即古旃然水東北流注濟水濟渠水斷返



溝惟承此始故云返受旃然汴水源絕卽以所受之  
水爲源古有是說惟云合索水則誤索水之源已移  
入汴水焉得別有索水志又云索水出小陘山北流  
入京水尤誤京水所合之水乃京水別源水經注謂  
之重泉水非索水明矣宋志建隆二年導索水自旃  
然與須水合入于汴又云金水河本京水導自滎陽  
黃堆山鑿渠引水過中牟抵都城西架其水橫絕于  
汴索合須水京合鄭水二水各自爲渠今京水改從  
河陰司南入索河提綱云滎陽水出縣南境諸山  
派自鞏縣汜水南界相連而東有無數小水北流合

爲一東北流經縣城東曰索河東經河陰南境有京  
河西南自瓦灌來會索河卽滎陽水下流合京水足  
正此經及注之失錢氏垢新斟注地理志云卞水出  
今滎陽縣南大周山合京索等水至中牟縣亦誤龔  
舊文小陘卽大周支峰嵩渚在其東寰宇記嵩渚山  
一名小陘山俗名周山今嵩渚乃後人所名與古不  
同方山紀要作萬山在小陘之西魏地形志京有萬  
尹山疑卽此山須水入汴卽入索今滎澤南別有須  
河在京河之東入小賈魯河非此須水鄭水今東京  
河源出鄭州西南梅山東北流至州西入小賈魯河

又東有磨河在州東入小賈魯河云至中牟縣下入  
汴亦宋時故道

東南至中牟縣北入于黃河

下經附記云汴河舊合蔡河東注泗州至徐州城北  
入于河後因河決蔡河湮沒汴自中牟入河明志中  
牟北有汴河舊合于淮正統六年改從此入河後淤  
今小賈魯河復合蔡河南流入洧漢志水道圖說云  
小賈魯河下流曰賈魯河東南流至扶溝縣與洧水  
合賈魯河卽古蔡河汴河自靈壁至盱眙舊瀆尙存  
徐州之流唐時已絕說具下

遼水源出塞外自三萬衛西北入境

遼河有東西二派西派曰潢河蒙古謂之西喇木倫源出古北口外克什克騰旗西集爾罕山東北流經部落北境又東經巴林左翼右翼二旗南與拜察河河會又東有黑河西北自察罕合齊爾哈圖河來會又東經翁牛特左翼旗北流沙漠中東會白狼河卽水經注所謂濫眞水也白狼河出喀喇沁右翼旗南明鞍山東北流八百里合英金河俗呼老哈河入於潢河潢河旣合白狼河水勢甚大東北經柰曼旗北折東南流分爲二派數十里復合東經科爾沁左翼

前旗北又東南經後旗北中旗南與東遼河合東派  
曰赫爾蘇河源出昌圖廳東柳邊內古南蘇水唐曰  
梁水西北流合庫魯鴉哈諸河出邊經額爾金山轉  
西南流三百里西合潢河二河既合東南流入開原  
西北柳邊爲巨流河開原卽三萬衛治西遼河源流  
最長漢志遼西郡有小水四十八并行三千四十六  
里水道圖說云今大遼水之源及所納巴林諸水又  
納白狼河及白狼河所納諸水也然則遼水於塞外  
已行漢里三千有奇矣

南流大清河合小清河入焉

大清河源出三萬衛東北  
分水嶺南流逕城東南十

五里合小清河入遼小清河源出蓋州衛  
秀水嶺西南流逕城南又西流合泥河

今開原東北柳邊外葉赫河自葉赫城東北西南流  
合占河入邊經縣東南會哈達河出東南柳邊外西  
北流入邊合葉赫河西流入巨流河大清河卽葉赫  
河小清河則哈達河也注云小清河源出蓋州衛分  
水嶺西南流逕城南誤援他水爲證蓋州衛今蓋平  
縣治在開原西南五百餘里其水無緣流合大清明  
志蓋州衛東有泥河南有清河下流皆入于海乾隆  
府廳州縣圖志蓋平五重河源出分水嶺下流匯清  
河泥河之水爲臨江蓋州衛別有清河非此清河也

珠子河從西北來注之

珠子河源出廣甯衛東北一百里白雲山南流入于遼河

珠子河今養息牧河提綱作楊檉木河云源出喀爾喀左翼南境東北流折東南與庫崑河會東南經牧廠地有好來崑德河烏克爾齊老河來會又有鴨子河俗曰沖古爾河東北自科爾沁左翼前旗南西南流來會又南流入柳邊彰武臺門之西至廣甯縣境又南入潢河水經注遼水亦言出砥石山自塞外東流直遼東之望平縣西屈而西南流逕襄平縣故城西又會白狼水疑卽此水

又南至海州衛三岔關入于海

約行一千三百五十里

今海城西北有三岔河口三岔河者巨流河及左右  
流合之土河沙林河也西南流合海州河入海行一  
千三百五十里當從漢志作行一千二百五十里  
鴨綠江源出長白山

乾隆府廳州縣圖志長白山在吉林城東南橫亘千  
餘里鴨綠混同土門三江悉源于此舊名不咸山亦  
名太白山唐書東夷傳高麗有馬訾水出靺鞨之白  
山色若鴨頭號鴨綠水白山卽此

東流爲阿也舌河

阿也舌河卽土門江提綱云阿几个色禽出長白頂



東北百里大山其西卽泥牙母泥牙庫色禽西北流  
爲松花江者此河自山東流百數十里折南流百里  
入土門亦別源也阿也舌卽阿几个色禽之轉音

去三萬衛東北十餘里

十當作干吉林在奉天東北八百二十里長白山又  
在其東則千里矣鴨綠江在吉林南九百七十七里  
北字衍

西南流逕遼東都司城東五百六十里大蟲江入焉大蟲

江源出龍鳳山南  
流入于鴨綠江

江自吉林十二溝西流入興京界西南合小水無

數過羣溝南西會佟家江提綱云佟家卽古鹽難水  
源出衣兒哈雅範山南西南流折東南入鴨綠江佟  
家江卽大蟲江也遼東都司城今遼陽州治

又西南至安市入海

唐東夷傳云鴨渌水歷國內城又東南至安市入于  
海通鑑地理今釋云安平今蓋平東北魏氏源 聖  
武記朝鮮安州唐太宗所攻安市城其詳未聞今江  
口在九連城南西岸則朝鮮義州地也

混同江源出長白山北流逕金會甯府過五國城

混同江古粟末水亦曰速末水亦曰諫洙江又名鴨

子河李氏兆洛 皇朝輿地略云江有二源曰松花  
江曰嫩江松花江出長白山北支峰小源甚衆其大  
者曰富爾哈河曰額赫額因河各流二三百里合而  
西北提綱云活同几河古名混同江松嘎里烏喇古  
松花江活同几河卽富爾哈河之北源松嘎里烏喇  
上流卽額赫額因河二河今通名松花江古時亦通  
名混同江葉隆禮契丹國志云天慶四年女真阿骨  
打首犯混同江之東名甯江府甯江今吉林北打牲  
烏拉地是今松花江卽古混同江矣江流經烏拉城  
西西北出柳邊巴延鄂佛羅門西又西合義屯河又

西北經伯都訥城西折東北與嫩江會嫩江源出黑龍江墨爾根西北伊勒呼里山說具下經兩江合東北流千餘里至三姓城西甯古塔河南來注之甯古塔河源出長白頂北佛思亨山曰虎爾哈河唐書北狄傳謂之忽汗河北流逕額多力城東折東北爲阿卜湖經會甯城北又東北經甯古塔城東又北流七百餘里至三姓城西經云混同江北流逕金會甯府過五國城所據卽此河也會甯府今會甯城五國城卽三姓城 聖武記云三姓城當甯古塔東北五國城在焉五國城當甯古塔河口故據以爲表甯古

塔河下流入混同江上流並無江名經云然者三姓  
以西混同江從上流名爲松花江因以此河當混同  
江通鑑注云金人謂鴨綠水爲混同江通鑑注得之  
傳聞與此經同一誤也

又北合松花江東入于海

混同江合甯古塔河東北流至查匪噶山西與黑龍  
江會又東北合烏蘇里江又東北合格楞河與滾河  
噶穆河凡行二千餘里至費雅哈東庫頁島西入海  
自會黑龍江以下或謂之混同或謂之黑龍名無一  
定王傅東都事略云靺鞨有黑水部其水掬之則色

微黑契丹目爲混同江則二名得通稱矣 聖武

記崇德八年遣阿爾津等征虎爾哈于黑龍江注云  
混同江卽黑龍江之下游故混同江亦通稱黑龍虎  
爾哈部卽居虎爾哈河所云黑龍江實三姓城北之  
混同江也

松花江源出長白山北流逕金故南京城

同治輿地圖混同江自會嫩江以上通名松花江與  
此經合金故南京城當在今伯都訥地

合黑龍江

黑龍江源出北山卽黑水靺鞨之舊  
居南流約二千餘里入于松花江

此黑龍江卽嫩江亦曰嫩泥江又名諾尼江古名難

水明時曰腦溫江又名忽刺溫江自伊勒呼里山西  
南麓東南流合興安嶺諸水逕墨爾根城西折西南  
經布特哈城東齊齊哈爾城西東南經杜爾伯特旗  
西札賚特旗東至郭羅斯後旗界合松花江源流約  
二千餘里古黑水府在墨爾根城故經以此江當黑  
龍也黑龍江源出喀爾喀東路中右後旗西肯特山  
曰敖嫩河卽古完水元時謂之幹難河東北流二千  
里至尼布楚境曰黑龍江又東北經界碑南又東經  
南岸界碑北合額爾古納河又東經雅克薩城南轉  
東南流曲折數百里經烏魯蘇木丹城西又東南合

精奇里江經愛琿城西黑龍江城東又東南行大山  
中五百里至查匪噶山西合混同江自泥布楚以東  
復行四千里其長倍於嫩江明時置黑龍江忽里平  
寨又設黑龍江莽亦帖站皆在全甯衛境全甯今喀  
喇沁地距嫩江已遠興安嶺以外聞見弗及明本紀  
永樂八年征漠北本雅失里聞大軍至西奔遂渡臚  
胸河追之及於斡難河卽界碑以西之黑龍江當時  
雖至其地亦未知其下游流逕何部也

至海西入于混同江

明海西衛東與野人衛分界

聖武記云扈倫四



部卽海西衛東海三部皆野人衛松花江合嫩江爲  
混同江東北經拉林城阿勒楚喀城爲扈倫部烏拉  
地屬海西衛又東北經三姓城爲東海部虎爾哈地  
屬野人衛上經云混同江過五國城又北合松花江  
五國城卽三姓城是在野人衛地此云松花江至海  
西入于混同江說亦參差

大凌河源出大甯自義州衛西六十里入境南流逕廣  
甯左右屯衛界入海

大凌河古渝水源曰忒布克河出喀喇沁左翼西境  
盛托蘇嶺與白狼河源相接古亦謂之白狼水漢志

臨渝渝水首受白狼是也東流合一水又東會傲木  
楞河卽古侯水東北經土默特右翼界至古興中城  
之南又數十里折而東南流入柳邊喀喇沁地明時  
屬大甯衛地理志韻編今釋云大甯今喀喇沁右翼  
南一百今察罕蘇巴兒漢成是也興中今爲朝陽縣  
東南界義州明志義州衛西北有大凌河下流入海  
東北有清河下流合大凌河大凌河經義州城西東  
南經錦縣東右屯衛城西廣甯左屯衛卽錦州治右  
屯衛在州東南七十里

小凌河源出大甯自廣甯左屯衛西入境合女兒河吟

刺河南流入海

小凌河古唐就水源出土默特右翼西界明安喀喇山曰蘇八兒寒河東北流會諸水爲小凌河折東南入邊吟刺河吟當作哈提綱云蘇八兒寒河東北流有木壘河會女兒河哈柳圖河水自西來會哈刺河卽哈柳圖河也河在邊外入小凌河經云小凌河自廣甯左屯衛西入境合女兒河哈刺河微誤小凌河經錦州西南東至雙陽庄西南流入海乾隆府廳州縣圖志云小凌河亦曰錦水州以此名

膠水源出膠州西南一百二十里鐵嶽山過密州五營

山鹵水入焉又北過高密縣注瀦澤與張奴水合由澤北入新河逕平度州昌邑縣界入海

膠水出鐵櫛山北流屈曲百餘里逕高密縣東折東北瀦爲百脈湖湖西有五龍河來會提綱云五龍河源出高密南山西北流經諸城縣東境又北流數十里一小水自西南來會折東北流經高密西境又北折而東經縣北又東入湖據水經注膠水逕膠陽縣東又東北流左會一水世謂之張奴水水發夷安縣東南阜下西北流歷膠陽縣注于膠水夷安今高密膠陽在其北則五龍河卽古張奴水矣經云膠水過

密州五弩山鹵水入焉又北過高密縣注瀦澤與張  
奴水合似以五龍河爲膠水正流膠河爲張奴水與  
酈說相反水經注又引伏琛齊記云膠水出五弩山  
寰宇記密州諸城縣膠山一名五弩山膠水之所出  
在今郡東南九十里如寰宇記所云伏說自以張奴  
水爲膠水酈氏失未分析經又牽合他說而誤密州  
明省入諸城明志云諸城元爲密州治洪武二年七  
月州廢經仍舊名新河卽元所濬膠萊河膠水自百  
脈湖伏流北出分爲二派一自分水嶺南東流承白  
沙河水折東南流至膠州東北店口西會大沽河南

至州東麻灣口入海爲新河南口一自分水嶺北西北流會藥石河循山麓經平度州西至昌邑縣東新河橋之西折北流經海倉西又北入海爲新河北口經止敘北膠河不及南膠河亦以水經注爲據也漢志却膠水東至平度入海圖說謂南膠河

濰水源出莒州西北九十里箕屋山

說文濰水出琅邪箕屋山雖指云箕屋山謂箕縣之屋山非山名箕屋也水經元和志寰宇記並云濰山輿地廣記作箕山箕屋之名出自近世明志云莒州西北有箕屋山濰水出焉據今名也提綱濰水俗曰

淮河曰東淮河亦曰東汝河

丹水有二東丹河源出昌樂縣東南二十里方山西丹河源出臨朐縣丹山二水皆北流至昌樂歷城西合流至壽光縣界入于海

東丹河今名小丹河西丹河曰大丹河合流經昌樂北稻田鎮合槐河流至穆塚村東北入瀾河經云入海亦舊道也明志東丹水北逕昌樂故城西丹水流合焉下流至壽光縣入于海與此經合瀾河古巨洋水下流有二口新口曰黑洋口舊口在其西蓋瀾河今徙而東丹水下流爲其所奪故舊入海今爲入瀾

爾

墨水源出平度州墨山南至卽墨縣界入海

今卽墨南大河出縣東北青山西南流經城西合二水爲墨河至女姑口入海寰宇記膠水縣墨山在縣東北六十里石色如墨有墨水出焉膠水今平度州墨山似卽青山云東北未詳

淄水源出泰安州萊蕪縣原山

原山今入博山縣境說具上經淄水出分水嶺東麓提綱云在青石關之西北顏神鎮之南顏神鎮卽博山縣治也



至壽光縣時繩之水注之

繩水源出臨淄縣西申池北流入時時水在臨淄縣西南

二十五里

漢志博昌時水東北至鉅定入馬車瀆水道圖說云  
今博興縣以東之小清河東北流至縣東境與清水  
泊下流合水經注時水出齊城西北二十五里平地  
出泉卽如水也亦謂之源水因水色黑俗又目之爲  
黑水如水今烏河漢志臨淄如水西北至梁鄒入沛  
與時水各爲一水通志略從水經注說云時水一名  
如水王氏士禎居易錄云今淄水流經臨淄城南十  
里沙石迅急東北至樂安境與時水同入海高氏士

奇春秋地名考略引青州舊志云時水出臨淄西南二十五里蓋伏淄所發地名矮槐樹西北逕黃山又北逕愚山又屈而逕杜山澧水入焉又北至濟南府新城縣東南之索鎮可通舟楫又北至博興南之灣頭與小清河會又東逕樂安縣北又東北由馬車瀆入海所云時水皆烏河繩水齊乘作澗水云北流勢極屈曲俗稱九里十八彎考略云今在臨淄縣西南其源卽申池也分爲二流西流曰系水北流曰瓏水灤河源出宣府城西一百二十里炭山冰井亂泉合爲此河北流逕古桓州南下流入開平東南流逕遷安縣

界

灤河古濡水水經注云出禦夷鎮東南今上都河源  
出獨石口外東北一百餘里巴延屯圖古爾山四泉  
湧出名都爾本諾爾西北流合數小水至茂罕和碩  
會三道河又西北經烏藍城西折東北流經波羅城  
西又東北經庫爾圖巴爾噶遜城東卽舊桓州城又  
東北經上都河屯舊開平城也今日昭乃滿蘇默城  
河自城南東流六十餘里會哈柳圖河折東南流合  
十數小水至郭家屯北會庫爾奇勒河又東南經豐  
甯縣東爲灤河五代史四夷附錄云漢城在炭山東

南灤河上據下流言也通鑑注漢城在檀州西北五百五十里城北有龍門山山北有炭山炭山西是契丹室韋二界相連之地其地灤河上源如注說灤河在炭山東炭山又在灤河上源東其山介兩河閒當在今潮河所出大山之北與巴延屯圖古爾山支脈相連而非一山明一統志云灤水發源炭山襲五代史而誤宣府明置左右前三衛今爲宣化府治在獨石口西南炭山又在其西一百二十里是在萬全縣境去灤源四百餘里無由相接明志亦承此經

御製灤源考證據嚮道大臣努三奏詳稽方向始

正其失聚珍本水經注恭錄

天言弁之卷首言

灤源者折衷斯在矣灤河東南經熱河行宮禁地  
至灤平縣北合興州河宜孫河宜孫河古盧水又東  
南經承德府南會熱河卽武列水又東南經上板城  
東下板城西合白河老牛河又東南合柳河清河豹  
河豹河亦曰寬河古高石水今日瀑河又東南至潘  
家口入邊經遵化州東入遷安縣界

灤河又南至樂亭縣界入於海

明志樂亭西有灤河經縣北岳婆港分爲二東曰葫  
蘆河西有定流河各入于海景泰中葫蘆河塞定流

河獨自入海其水清碧亦謂之綠洋溝今縣西北有  
定流河集灤河自集東經縣西又南別爲二派一西  
南經齊家莊至新橋口入海一東南入海曰高密河  
白河上源自宣府城東北三百里雲州獨石東南流逕  
古北口

白河古沽河源出獨石口外馬尼圖嶺東南支峰南  
流入邊爲獨石水東南經雲州堡東又東南經赤城  
縣東石合鎮甯堡水明志謂之西河左合滴水崖水  
紀要所云白河上源也又東南經甯遠堡西至甯江  
堡北龍門水自龍門縣西來盤道口水自盤道口東

來合注之龍門水古樂陽水亦曰南河盤道口水古  
乾溪水提綱以爲白河正源二水旣合南經靖安堡  
西折東出東河口合數小水入古北口西邊古道谷  
口經云宣府城東北三百里雲州獨石獨石元屬雲  
州明置開平衛其地去赤城百里赤城去宣化府治  
又二百里別本作三十里誤

至密雲縣西黃花鎮川河西來注之

黃花鎮川河源出  
塞外流入黃花鎮

逕昌平至懷柔  
縣入于白河

白河自石塘嶺東南流經密雲縣西會潮河折西南  
經懷柔縣東南七渡河西北來注之七渡河卽黃花

鎮川河顧氏炎武昌平山水記云昌平州北八十里  
爲黃花鎮其水曰黃花鎮川河出塞外自二道關入  
口逕渤海所懷柔至順義界入白河其流九曲俗謂  
之九渡河九渡卽七渡之異水經注沽水逕漁陽故  
城西而南合七度水出北山黃頰谷故亦謂之黃  
頰水七度之名由來舊矣

白河又東南逕順義縣東潮河東來注之

潮河在密雲縣東南下流

至順義縣入于白河

白河合七渡河流逕順義縣北二十里牛欄山東與  
潮河故瀆會乾隆府廳州縣圖志云鮑邱水今名潮



河源出口外亦自古北口西南流入密雲縣東南合  
白河其故道本自縣流逕懷柔順義與白河合復自  
白河分流逕通州三河寶坻合洵河入海明嘉靖三  
十四年遏潮河不使入順義遂竟由密雲縣境合白  
河昌平山水記潮河自塞外興州發源入古北口西  
南經密雲懷柔至牛欄山與白河合顧氏所據亦舊  
瀆也

白河逕通州至武清縣東南爲直沽下流會衛河爲丁  
字沽入于海

紀要在直沽武清縣東南百二十里衛河白河丁字

沽合流於此乾隆府廳州縣圖志云天津直沽在府城北南則衛河合南路之水北則白河受北路之水西則丁字沽受三角淀之水皆至城東北三岔口合流東注舊名小直沽其東南十里曰大直沽又東南百餘里爲大沽口眾水由此入海卽通典所云三會海口也說與此經微異

舊曰此山與此縣皆與

百餘里爲大岳曰翠峯山北入滎陽郡與汝水三會  
流車封舊名小面岳其東南十里曰大新山又東南  
西限下字岳與三鎮對多水發毛

縣東南入滎陽郡南限之次北限曰阿曼此限之水

今水經注卷二

河漢水經注卷二

今水經注卷三

錢塘吳承志纂

吳興劉承幹校

北水

衛河一名御河漢名爲屯氏河

漢志館陶河水別出爲屯氏河水道圖說云今山東館陶縣衛河東北流過臨清州及臨清州北之運河過武城縣直隸故城縣景州東光縣蓋其故瀆也館陶以上漢時爲清河水又上則淇水沾水也

源出河南衛輝縣西北七里蘇門山東流逕衛輝府城

北一里又東流淇水西北來注之

淇水源出彰德府林縣大號山流逕淇縣

西北三十里合清水清水源出輝縣西南七十里山陽鎮東南流逕獲嘉縣界又東南至淇縣界注于淇淇水

又東流入衛

宋志御河源出衛州共城縣百門泉明志云輝縣西

有蘇門山一名百門山山有百門泉泉通百道其下

流為衛水故又名衛源百門泉即古淇水漢志其北

山淇水所出圖說云今河南輝縣百泉水是也水經

濁漳水注引鄭康成尚書注云今河內其北山其水

出焉東至魏郡黎陽入河近所謂降水也淇水一名

共水鄭以為即禹貢降水自是入河巨川說文淇水

出河內其北山或曰出隆慮西山隆慮今林縣漢志  
壺關沾水東至朝歌入淇圖說云今謂之淇水出山  
西壺關縣東流至河南淇縣入衛河壺關之淇卽出  
隆慮西山蓋二水下流互受故上源通得淇名淮南  
子地形訓淇出大號注大號山在河內其縣北或曰  
在臨慮西亦以淇源有二并大號亦析爲二山水經  
主隆慮其北之淇因別名清水經云清水出河內修  
武縣之北黑山修武今獲嘉縣治其北卽輝縣黑山  
注云在白鹿山東元和志衛縣黑山在縣北五十五  
里其城縣白鹿山在縣西五十四里白鹿西接太行

黑山又東界淇縣是輝縣以北諸山魏時通名黑山  
清水卽今百泉水魏地形志共有栢門山栢門水南  
流名太清水栢門卽百門清水卽淇水矣水經注清  
水上承諸陂散泉積以成川溪曰瑤溪亦曰瑤澗自  
其上源言之今百泉水上源爲五峪口水又西爲小  
丹河小丹河卽長清河五峪口水則酈氏所云清水  
寰宇記新鄉縣清水去縣北十里西自懷州獲嘉縣  
界流入與淇水合其城縣百門陂在縣西北五里陂  
南通漳水百門陂與清水爲二本之酈說九域志獲  
嘉下云清水與寰宇記同汲下變文言御河以其時

水官經理因淇水舊瀆別立新名獲嘉以下爲清水  
入御無復清之名也經從宋志又以淇水逕淇縣西  
北合清水清水至淇縣界注淇水舊文入之注說未  
免失覈明志彙云輝北有衛水源發蘇門山西南有  
清水獲嘉北有清水下流入衛河新鄉汲北有衛河  
淇西北有淇水下流入衛河今昔判然矣

衛水又東過大名府濬縣內黃界漳水入焉

今衛河經濬縣西又東北經內黃西合洹河又東北  
經內黃北至大名府元城縣東北東昌府冠縣西與  
漳河支流會明志內黃西北有回隆鎮有回龍廟巡



檢司嘉靖三十六年漳河決於此入衛

至臨清汶水

卽會通河

北流入之過東昌府武城縣界入濟

南府境逕德州城西北過河閒府界去景州城東二十里歷故城吳橋東光縣境下至滄州

衛河至臨清西合運河以下今通名運河乾隆府廳州縣圖志云故城縣運河自山東武城縣流入逕縣南關外復自山東德州界北流逕吳橋景州東光交河與南皮縣分界又東北入滄州界經先德州景州後故城吳橋敘次亦亂

又東北入于海

上經已云白河會衛河爲丁字沽入于海此重出表  
云白入海黃花鎮川河潮河入白衛入海淇漳汶溇  
桑入衛竟似二河分流入海矣

漳河歷成安廣平肥鄉曲周入于衛河

上經云衛水過大名府濬縣內黃界漳水入焉與此  
經不同明志漳河經河南臨漳縣由畿南眞定河間  
趨天津入海其分流至山東館陶西南五十里與衛  
河合永樂九年決張固村河口與滏陽河合流正統  
十三年御史林廷舉言漳河至肥鄉堤岸逼隘元時  
分支流入衛河以殺其勢永樂閒堙塞舊跡尙存去

廣平大留村十八里宜發丁夫鑿通置閘過水轉入  
之而疏廣肥鄉水道從之漳水遂通於衛正德元年  
濬滏陽河河舊在任河新店村東北源出磁州經永  
年曲周平鄉至穆家口會百泉等河北流成化閒舊  
河淤衝新店西南爲新河合沙洺等河入穆家口英  
宗時漳已通衛宏治初益徙入御河其後復入新河  
巡撫官言穆家口乃眾河之委當從此先而并濬新  
舊河令分流漳滏缺隄以漸而築從之自此漳滏匯  
流而入衛之道漸堙矣萬厯二十八年給事中王德  
完言漳河決小屯東經魏縣元城抵館陶入衛爲一

變其害小決高家口析二流於臨漳之南北俱至成  
安東呂彪河合流經廣平肥鄉永年至曲周入滏水  
同流至青縣口方入漕河爲再變其害大滏水不勝  
漳患在民衛水昔仰漳而今舍漳患在運塞高家河  
口導入小屯河費少利多爲上策仍迴龍鎮至小灘  
入衛費鉅害少爲中策築呂彪河口固隄障水運道  
不資利地方不罹害爲下策命河漕督臣集議不果  
行詳志說明初漳水自廣平北東北流合滹沱河其  
支流由大畱村東經魏縣元城北至館陶西南合衛  
河後西合滏陽河嘉靖中又決廣平西南內黃回龍

鎮東北至元城小灘鎮入衛尋又改徙而西經云歷  
成安廣平肥鄉曲周入于衛河蓋合滏陽河歷平鄉  
甯晉爲胡盧河東北合滹沱至青縣入衛也下經滹  
沱河至阜城縣沙水入焉注沙河至甯晉縣匯爲大  
陸澤過冀州境西北至武邑縣北界爲夾河逕阜城  
縣西北爲胡盧河卽衡漳之別名也入於滹沱河大  
陸澤以下卽漳水合滏陽所行之道經別爲二仍舊  
說耳今漳河復徙而東自廣平西南分爲二派一東  
流經魏縣元城至冠縣西館陶西南入運河一東北  
流經廣平東南至邱縣南又分爲二一東北經威縣

清河故城景州阜城交河至青縣南七十里杜林鎮  
東合滹沱東派曰老漳河一北流經廣宗鉅鹿至新  
河西南入北泊自泊東北出合滹沱曰新漳河乾隆  
府廳州縣圖志云漳水自明以來徙合滄陽 本朝  
康熙中東徙自邱縣北注甯晉北近年上流經由館  
陶入衛不合滄陽矣胡盧河宋志云源於西山據泚  
濟諸河而言今北泊以下通名胡盧河

滹沱河源出山西繁峙縣東北三十里秦戲山歷代州  
崞縣忻州定襄五臺孟縣

滹沱水一名泐水源出代州繁峙縣東秦戲山有三

泉並導西南流合州境諸水至忻州北境忻口折東  
南流經定襄五臺孟縣迴環九百里入黑山關又東  
五十里合衛水漢志常山郡靈壽禹貢衛水出東北  
東入虜池圖說云今直隸靈壽縣黑山關水東南流  
入虜池錐指云周禮虜池嘔夷卽禹貢之恆衛也恆  
卽滹水衛卽虜沱古今異名滹沱卽禹貢衛水靈壽  
之衛漢人所名爾泰戲山元和志一名武夫山在繁  
峙縣東南九十里今在縣東北百二十里經作三十  
里文有譌奪

北入眞定府平山縣界逕靈壽縣至眞定府城南逕晉

州過保定府境束鹿縣南三十里達於深州至阜城縣  
提綱云自平山以下自昔遷徙分合不常今自靈壽  
至束鹿所經州縣並與經同束鹿以下分爲二派一  
東南流至衡水西北折東北由胡盧河經武邑北交  
河西至獻縣別分爲二一東北流合支渠經深州饒  
陽南河閒北至保定合會同河乾隆府廳州縣圖志  
云束鹿滹沱河舊由縣北界其後漸徙而南明正德  
十四年由晉州決入縣境天啟二年再決因徙縣治  
以避之 本朝順治十二年康熙五年並由晉州寨  
子村決入遂分爲五道皆逕縣南入冀深二州界雍



正三年又東徙決周頭村直衝束鹿城四年始相度  
得舊河一道由禾邱南至焦岡入滏河遂至第四溝  
開濬深通導之南流自是縣境乃免衝潰之患東南  
一派卽自第四溝開濬深通者也東北一派乾隆時  
已塞後復通流明志滹沱河明初故道由藁城晉州  
抵甯晉入衛其後遷徙不一又云冀州西北有漳水  
北有滹沱河成化十八年滹沱挾漳南注爲州患正  
德十二年二水自甯晉南北流患始息晉州滹沱河  
舊在縣南萬秣二十三年自束鹿縣南行始不經州  
境武強南有滹沱河舊合於漳萬秣二十六年北出

饒陽縣境縣之滹沱河始涸衡水北有滹沱河舊與  
漳合成化八年北徙不經縣界如志所云自束鹿南  
達深州至阜城皆萬厯以前舊道萬秭以後由饒陽  
至獻縣不經阜城紀要云滹沱河經束鹿安平深州  
饒陽獻縣據明末 國初言矣

沙水入焉沙河在沙河縣治南逕廣平府城五十里下  
達雞澤界洛河入之洛河源出遼州大行山  
至武安縣柏林里伏流至洛遠里復出東逕  
廣平府城北三十五里至雞澤界入于沙河

沙水古馮水紀要云源出湯山洛水即寢水徐堅初  
學記引水經注云一名漳水亦曰南易水唐時二水  
俱入漳河元和志云雞澤洛漳二水在縣東南二十

五里合流東入平鄉縣界明志平鄉西南有漳河西  
有沙河又有洛河東有滏陽河萬秣三十年漳挾滏  
陽河北去會於沙洛諸河明初漳洛分流後漳水又  
挾滏陽河入洛河今漳滏洛沙四河各自爲流沙河  
於任縣東入南泊卽古大陸澤洛河又在其東入泊  
泊水東北出爲新豐河至新河西南合新漳河入北  
泊又自泊流出經衡水西北合滹沱河

滹沱河歷河間府獻縣城南易水注之至交河縣與高  
河合爲交河至青縣入于衛

滹沱河東南一支自衡水至獻縣別分二派一經縣

南會老漳河合運河一自縣西分流曰鹽河東北經  
河間東至大城子牙鎮爲子牙河經靜海文安至三  
角淀合永定河乾隆府廳州縣圖志云滹沱下流舊  
皆在今大城文安西北界自宋元來改流二縣之東  
不經西界又圖經云滹沱之環文安者三支今惟子  
牙河一支會諸流匯邕奴水今益改而東下流逕會  
清河達西沽矣邕奴水卽三角淀也明志大城東北  
有黃汎河源自交河分流至縣境入三角淀黃汎河  
卽子牙河云自交河分流當時支分在獻縣以東與  
今不同高河舊自河間流入交河明志交河西北有

高河經縣南合滹沱今堙

元和郡縣志太平寰宇記二書敘橐城以下滹沱水

道自今無極深澤束鹿安平饒陽蠡縣肅甯河閒高

陽任邱至文安大城入海禹貢錐指不列肅甯河閒又易蠡縣為博野次之束

鹿之下俱誤宋博野附甯邊軍郭下即今蠡縣治寰宇記敘軍境云南至安平縣五十里西南至蒲陰縣

四十二里是縣南境至今祁州東北安平縣北而止滹沱經安平南焉得過束鹿北即流涉博野界中也

元豐九域志略同宋史河渠志滹沱河由真定深州

乾甯與御河合流神宗熙甯元年河水漲溢詔都水

監河北轉運司疏治六年深州祁州永甯軍修新河

八年正月發夫五千人并胡盧河增治之元豐四年

正月北外都水丞陳祐甫言滹沱自熙甯八年以後  
汎濫深州諸邑爲患甚大諸司累相度不決謂其下  
流舊入邊吳宜子淀最爲便順而屯田司懼填淤塘  
灤煩文往復無所適從昨差官計之若障入胡盧河  
約用工千六百萬若治程昉新河約用工六百萬若  
依舊入邊吳等淀約用工二十九萬其工費固已相  
遠乞嚴立期會定歸一策詔河北屯田轉運司同北  
外都水丞司相視詳史志說熙甯以前滹沱已由安  
平徙入胡盧自武強獻縣至青縣合御河續通鑑長編注引舊

史河渠志胡盧河入深州武強縣與滹沱河合流今志同九域志云經安平饒陽

河閒任邱大城及父母李詳二寨乃程昉新河之道也續資治通鑑長編熙甯六年五月癸丑河北路察訪副使趙子幾言深州安平縣及永甯軍祁州界開滹沱河新河七月己丑管勾外都水監丞程昉請於保定軍東舊滹沱河南岸臺山口東南疏一川行七十里至乾甯界會於御河詔李南公與昉及屯田司同詳度竟不行七年正月甲子上言昉昨修漳河聞漳河歲歲決修滹沱河又卻無下尾王安石曰修漳河出卻三縣民田滹沱河爲事干塘泊臣以爲滹沱河舊入邊吳淀亦是塘泊新入洪城淀亦是塘泊卽

淤卻上泊與下泊有何利害之異昉尋奏深州開引

滹沱河水淤田及開回胡盧河并回滹沱河下尾昉

新河起自安平下流至保定縣境初議由縣東引流

至靜海合御河既改由縣西決入雄州洪城淀九城志雄

州歸信有紅城塞紅城後又開回下尾由縣北過霸

州東至大城北與唐五代宋初故道相應惟此渠實

未順行陳祐甫言熙甯八年以後汎濫深州諸邑為

患甚大是渠成即散溢別出又云治程昉新河約用

工六百萬長編載是年六月己巳入內東頭供奉官

勾當御藥院竇仕宣言河東北流自大吳向下原作下吳



據前後  
文正 與御河葫蘆滹沱三河合流深恐漲水之際

隄防難限乞令都水監定三河合黃河如何作隄防  
限隔或不合黃河其三河於何所歸納詔李立之相  
度後立之言三河別無回河歸納處須合黃河行流  
滹沱仍與胡盧俱合黃河則安平之渠至元豐時已  
絕九域志據防奏入之失未覈矣禹貢雖指云塘灤  
興文安之瀆廢蒙按河渠志河北諸水下云太宗瀋  
化四年春詔六宅使何承矩等督戍兵萬八千人自  
霸州界引滹沱水灌稻爲屯田用實軍廩且爲備禦  
焉霸州所引卽文安之瀆瀋化時尙未改徙其南出

當在至道後也邊吳淀在高陽西北河渠志東起順安軍西邊吳淀

至保州合齊女淀勞淀為一水何時疏入未詳長編注引

順安今高陽保州今保定府治司馬光日記云永濟河為黃河所截北趨五干渠前

歲又為黃河所闕會地震李村口決北趨五干渠前

蘆泊趨五干淀似即溇沱漲溢之事神宗紀熙甯元年六月乙丑河決棗疆縣七月辛卯以河朔地大震

命沿邊安撫司及雄州刺史侯遼人動息以聞癸巳疏深州溢水河決地震並與記說合疏深州溢水當

是因李村口決疏之蓋溇沱初決東北入

五干淀後導之西北因匯於邊吳淀耳

三國志魏書武帝紀建安十一年鑿渠自呼沱入派

水名平虜渠又從洵河口鑿入潞河名泉州渠以通海裴松之注派音孤蒙按水經沽河篇又東南至泉州縣與清河合東入于海清河者派河尾也酈道元

注清淇漳洹滏易涑濡沽滹沱同歸于海故經曰派  
河尾也此紀派字當讀爲派濁漳水篇注清漳逕章  
武縣故城西故濺邑也枝瀆出焉謂之濺水東北逕  
參戶亭分爲二瀆應劭曰平舒縣西南五十里有參  
戶亭故縣也世謂之平虜城淇水篇注清河又北逕  
浮陽縣故城西又東北滹沱別瀆注焉謂之合口也  
濺水出焉又東分爲二水又東北逕紵姑邑南又東  
北逕窮河邑南東北至泉州縣北入滹沱水經曰笥  
溝東南至泉州縣與清河合自下爲派河尾也又東  
泉州渠出焉兩注敘平虜泉州二渠首尾甚備不云

派水知所據本正作派元和郡縣志滄州魯城縣平

開之太平寰宇記清池縣平虜渠在縣南二百步魏

建安中于此穿平虜渠以通軍漕北伐匈奴又築城

在渠之左與注說並合通鑑注引紀文釋之云李賢

曰呼沱舊在饒陽南至曹操因饒河故瀆決令北注

新溝水所以今在饒陽北以此渠為在饒陽案李說

見後漢書光武紀注不云即平虜渠寰宇記深州饒

陽縣枯白馬渠下引通典說與此注同末云後魏刺

史楊真以為清甯河瀛州河間縣滹沱河下云輿地

志滹沱河在今縣西二十里按河經武垣東北後魏太  
和年刺史王質掘直之楊真改為清甯河東武垣城  
下又云西武垣城在今郡西南三十八里有故城存  
卽秦所置其故城東微北三十里又有一武垣故城  
時人謂之東武垣城即當今郡南二十五里蓋因魏  
武鑿渠引滹沱水遂移西武垣縣城於此置武垣縣  
饒陽渠逕武垣城北下流似入文安濁漳水經又東北  
至昌亭與滹沱河會又東北至樂成陵縣北別出所  
述滹沱水道與章懷說復不相符水經魏人所為滹  
沱正流經昌亭樂成必無有誤疑平虜渠首本起樂

今水經注卷三十三求恕齋

成饒河一渠別鑿以分水勢耳元和志饒陽縣漳沱  
河下不載魏武之說州理城下云公孫泉叛司馬宣  
王征之鑿漳沱入派水以運糧因築此城蓋漳沱有  
魯沱之名因號魯口是渠屬之司馬宣王與平虜截  
然爲二渠水北出文安下流應仍入漳沱云派水者  
文安以北有易滹涑濡沽諸水故不得專舉一名也  
元和志安平縣別有派水云今名疆河西自定州義  
豐縣界流入此派水當爲派水卽初學記引水經注  
所云定州派水者派字涉饒陽下派水之文而誤或  
疑安平與饒陽接壤二水當通合爲一如其說漳沱  
所行卽派水舊瀆章懷何以謂之新溝又派河爲清  
淇漳洹易滹涑濡沽漳沱十水所匯酈說甚明若派  
水自饒陽北別注清河則派河所受有  
十一水矣注略不言知古無此水也

### 易水源出易州閻鄉西山東過涿州南

易水出易州西山龍華店西北東流經州南至定興  
西南五里河口合沙河沙河古遒蘭河上流合濡水

明志易州西北有窮獨山濡水所出南有易水與濡  
並東流而爲白溝河所謂北易水也 御批通鑑輯

覽三易皆出易州自定興西南合拒馬河者曰中易  
在定興西爲沙河者曰北易逕安肅厯安州新安爲  
霍河者曰南易沙河通得易名易水東南經北河村  
拒馬河自涑水南流來會又東南經定興南至新城  
南白溝村拒馬河東南一支又自涑州來會經云過

涑州南據新城言爾

又東過安州城北保定府境沙河合焉

沙河源發山西繁峙縣白坡頭

流逕定州新樂縣界至祁州唐河北來注之唐河源自大同府靈邱縣南逕飛狐口倒馬關過唐縣東南至祁

州入于沙河沙河又逕祁州城西南二十里至博野縣  
滋河來注之滋河源出靈邱故同山逕行唐縣張茂村  
伏流不見至眞定府界南孟社復出東南流逕無極深  
澤二縣過祁州城西南三十里入于沙河沙河又東入  
于易水

易水故道自新城流入容城新安縣境明志云安州  
北有易水府境九河之水所匯也下流至雄縣南爲  
瓦濟河新安明屬安州易水所匯今白洋諸淀陸氏  
隴其三魚堂集畿輔八府地圖記白溝河經容城至  
雄縣南東流矛兒灣入玉帶河一支由容城縣分流  
至雄縣西三里名黃灣河又經新安流入四角河黃  
灣河舊爲易水經流後分支入矛兒灣其流遂微今

惟雄縣南一支在趙北口東入淀不復至新安矣沙  
河古滋水源出繁峙東至祁州三岔口合唐河及今  
滋河爲豬龍河至安州東南入淀乾隆府廳州縣圖  
志云圖經保定滋沙滹三水舊自蠡縣引流而東歷  
肅甯之五千淀而達于雄縣之瓦濟河中堡玉帶二  
河皆其經流處也後自蠡縣北入高陽歷新安雄縣  
而出任邱之趙北口于故道多湮而玉帶河之名亦  
移於順天府之保定縣經云安州與今水道合滹水  
卽唐河古嘔夷水

沙河源發山西繁峙縣白坡頭頭下空闕一字畿輔



地圖記作白坡頭口口字亦空圍之誤原文作何字  
未詳滋河源出靈邱枚回山原本作山西放回山校  
本云考畿輔地圖記作枚回山靈壽縣志云枚回府  
志原本作放回誤金史繁峙有梅迴鎮今據以改正  
枚迴之名始見於元和志寰宇記引土地記云鹵城  
東三十八里有枚迴嶺北與高是山連麓接勢通爲  
高是山鹵城故城在今繁峙東百里滹沱河源西二  
十里高是山今恆岳北山經云高是之山滋水出焉  
而南流注于滹沱澗水出焉東流注于河今澗水出  
渾源州南恆岳西麓之翠屏山東南流合溫泉水嘔

夷水經太白山北爲唐河太白山南入長城爲巖頭山卽沙水所出枚迴在故鹵城東三十八里則在今滹沱河源東十八里枚迴當卽巖頭滋水卽沙水矣漢志南行唐牛飲山白陸谷滋水所出此滋水別源今滋河源出五臺縣東烏牛山卽牛飲山水二源古通謂之滋山經舉北以概南漢志舉南以概北是以言各不同北滋水亦曰派水元和志饒陽州理城晉魯口城也公孫泉叛司馬宣王征之鑿滹沱入派水以運糧因築此城安平下云派水今名疆河西自定州義豐界流入義豐下云派水縣西二十五里派水

卽此水泝水一名疆河是以又謂之沙河唐書郭子儀傳史思明以衆數萬尾軍及行唐子儀挑之賊引去乘之又破於沙河沙河之名始見於此九域志新樂有泝水安平蒲陰博野有沙河上流俱不詳書集傳引晁說之書傳云今之恆水西南流至真定府行唐縣東流入于滋水又南流入于衡水恆水古恆陽溪今日小清河其水西南流至行唐當入沙水傳云入滋水明當時尙通名爲滋也明世始分沙滋爲二一統志不能詳考合古今滋水爲一因以沙水所出之山屬之滋水此注俱襲舊文原本作山西放回固

非校本改從畿輔地圖記作靈邱枚回亦誤靈邱在  
繁峙之北無由與行唐相接且九域志梅迴寨繫繁  
峙下宋時此山已不入靈邱紀要牽合廣靈滋水尤  
謬廣靈滋水與沙河中隔寇源與行唐滋河又中隔  
唐沙兩河如何繞合水經注釋云廣靈滋水下流北  
入于桑乾與出行唐之滋水有別是已沙滋二河北  
宋時尙南入衡水今北合唐河宋志景德元年北面  
都鈐轄閫承翰自嘉山東引塘河三十二里至定州  
醜而爲渠直蒲陰縣六十二里會沙河徑邊吳泊遂  
入于界河以達方舟之漕沙河與唐河通流蓋始於

此其下流不入安平當在金元以後尙書地理今釋以沙河爲禹貢恆水段氏玉裁經韻樓集水經無派河篇引戴氏震說以爲卽說文派水俱考之不審禹貢恆水漢志云東入滹並不南入滹沱說文派水自是入海大川與此派水名同實異寰宇記行唐滹沱水出州西流至忻口而東出房山縣界其源自派山下理所又云靈壽派水經白羊山從行唐東過溫泉入房山界寰宇記已分代州派河與定州派水爲二不必強合

沙河之名始見於唐書郭子儀傳古時謂之滋水山

海經北山經高是之山滋水出焉而南流注于滹沱  
澮水出焉東流注于河滋水卽此水也水有二源南  
源出五臺縣東烏牛山去澮源絕遠北源出繁峙東  
巖頭山山在茨溝營邊墻以外與太白山連麓卽高  
是支山漢志南行唐牛飲山白陸谷滋水所出據南  
源言之元和郡縣志靈邱滋水出縣西枚迴山據北  
源言之二水下流合入滹沱故又有派水之名說文

水部派水出鴈門葭人戍夫山東北入海段氏玉裁

注卽葭沱之源通典滹沱水出繁峙縣東南派阜山  
寰宇記靈壽縣派水經白羊山山之

下有白石如羊頭角身足粲然逼真經行唐縣東過  
溫泉入房山界也派水卽滹沱水白羊山在今平山

縣西北百六十里溫泉在縣西四十里並滹沱所經過行唐在靈壽東北記文經行唐縣四字有誤魏

書太祖紀慕容寶弟賀麟退阻泝水通鑑注泝水在

中山新市縣輿地志云盧奴城北臨澮水南面泝河

此泝水乃沙水因下流入泝水上流遂通謂之泝水

隋書地理志繁時有滹沱水泝水并其源亦目爲泝

矣明一統志真定泝河在阜平縣源發山西經縣界南入滹沱河泝水源發山西本之此志南入滹沱

河亦據唐宋以前舊說水經澮水篇注無泝水太平寰宇記安

喜泝水下引云泝水歷天井澤南水流所播爲澤俗

名爲天井淀此文出滹沱佚篇元和志安平泝水今

名疆河西自定州義豐縣界流入義豐泝水縣西二

十五里詳覈地形此水自天井澤以下折東北流至  
邠州西又折東南流寰宇記所載亦同宋史河渠志  
景德元年北面都鈐轄閻承翰自嘉山東引塘河三  
十二里至定州醜而爲渠直蒲陰縣東六十二里會  
沙河徑邊吳泊遂入于界河以達方舟之漕景德中  
始引此水北流過博野合滏河入高陽清苑諸淀寰宇  
記博野縣滏河在縣東南三十五里無派水元豐九域志失考本末以爲  
漢時故瀆與班志恆水相近遂云行唐有常水輿地  
廣記從而實之謂是禹貢之恆蔡沈書集傳引晁說  
之傳云今之恆水西南流至眞定府行唐縣東流入



于滋水又南流入于衡水非古逕矣晁氏目驗此水

正流入滹沱惟支渠合滹因疑其辭金元以後川流

改易明史河渠志嘉靖十一年太僕卿何棟言真定

鳴沙茲三河俱發源五臺會諸支水抵唐河藺家圈

合流入河閒其時此水南派已絕一統志沙河至博野縣與滋河合

河至河閒入衡水滋河至河閒已合唐河云入衡水者龔晁說而誤也蔣氏廷錫尙書

地理今釋據今沙河恆水至祁州界合茲水入于唐

水唐水卽滹水置晁說於不論可謂疏闊成氏蓉鏡

禹貢班義述云水經滹水篇又東南過中山上曲陽

縣北恆水從西來注之先言過上曲陽北然後言恆

水注之則恆水入滹當在今曲陽縣北酈注滹水又  
東逕左人城南又東恆水從西來注之又東逕中人  
亭南左人中人並在唐縣西北恆入滹在左人中人  
之閒亦當在唐縣西北 大清一統志引舊志云有  
橫河在曲陽縣北源出恆山東南流入滹卽恆水與  
漢志水經合今釋蓋誤圖說以橫河水小仍主沙水  
由未知古時此水本不入滹也續漢書郡國志上曲  
陽恆山在西北劉昭補注有泉水隋志恆陽有恆山  
有恆陽溪泉水溪水皆小水之謂

易水又東至雄縣南爲瓦濟河溫義河來注之

溫義河源發易

州城西五迴嶺逕滿城縣北十里名大册河至清苑縣北十五里名徐河逕安肅縣西一十里至新安縣南八里與漕河合曹河出安肅縣南三十里入于徐河徐河合曹河曰溫義河又南與長流河合至雄縣南入瓦濟河

溫義河今名依城河於新安西南合長流河入淀經  
云易水東過安州城北與保定府境沙河合焉又東  
至雄縣南爲瓦濟河溫義河來注之敍次亦亂溫義  
河在豬龍河之北易水至淀東出無緣先合沙河明  
志新安南有曹河又有徐河經縣南合流爲溫義河  
又南與長流河合又東南入于瓦濟河依志說溫義  
河合長流河入淀卽入瓦濟河非至雄縣始入今易

水改從趙北口東入淀豬龍依城二河始合流至雄  
縣會瓦濟河與前明不同長流河卽霍河源出易州  
西南獨石岡徐河逕安肅縣西一十里畿輔地圖記  
作在縣南四十里

至保定縣爲磁河過河閒府境任邱縣西六十里至獻  
縣五里舖入于滹沱河

今易水自淀東出爲玉帶河亦名清水河經保定城  
北又東北經霸州南合固安引河爲會同河又東北  
爲中亭河至東安南合永定河入西沽明志固安西  
南有拒馬河卽涑水源自代郡下流合易水爲白溝

入三角淀任邱西北有瓦濟河下流爲五官淀注於  
滹沱河明時易水於保定北分爲二派一東北流合  
桑乾河爲會同河出苑家口匯三角淀一西南流合  
磁河注五官淀又自淀南出至河間北絕今滹沱河  
支津南注獻縣入滹沱河經不云會同河以霸州以  
東爲桑乾河正流也乾隆府廳州縣圖志任邱易水  
故道在縣西北三十里自新安流入與雄縣分界又  
東入文安縣界志所云乃東流一派與經不同磁河  
在保定西南紀要云玉帶河在縣北遶縣東南入於

磁河

桑乾河源出大同府馬邑縣西北十里洪濤山下與金龍池水合

桑乾河古治水亦曰灤水源出朔州東南山陰西南雁門山支峰漢志所謂累頭山也今俗名黃水河其上源有二一出州東北馬邑鄉西北洪濤山一出州西南甯武東南管涔山北麓出管涔者曰灰河自陽方營西出邊城東北流合數小水至州南出洪濤者又有二源一爲洪濤泉自金龍池流出至馬邑城西一爲桑乾泉自州北流經東南二泉並南合灰河明志桑乾河發源太原之天池伏流至朔州馬邑雷山

之陽有金龍池者渾泉溢出是爲桑乾據洪濤泉言也經云河出洪濤山下與金龍池水合以桑乾泉爲正源與志微異水經注洪源七輪謂之桑乾泉亦據洪濤泉爲說其東又有馬邑川水今不能定其爲何水提綱云灰河與洪濤水會而東北經馬邑縣城南又東北經山陰縣北有一水自西北來注之山陰北一水疑卽馬邑川水又東北會黃水河與注說合矣

東流過渾源州北逕宣府保安州新城西南四十里洋河東南來注之

洋河源出境外逕宣府城南五里東流逕保安州城西南一十里又東南入于

桑乾河

桑乾河於應州北合渾河以下亦通謂之渾河東北  
經大同府南渾源州北至廣靈西北入宣化府境經  
蔚州北西甯南至保安州東南與洋河會洋河有東  
西二源東洋河卽古于延水亦曰修水出察哈爾右  
翼兆哈嶺曰兆哈河東南合七七哈那河爲東洋河  
自天鎮東北白陽口入邊城至萬全西南柴溝堡南  
合西洋河西洋河源出陽高西北邊外太僕牧地亦  
曰南洋河古鴈門水也自車石溝口入邊經縣北又  
經天鎮北懷安西北合東洋河二河旣合東流合清  
水河又東南經府城南至州東北雞鳴驛入桑乾河



桑乾河又東經新保安堡南明志保安州舊城在西  
南山下景泰二年移於雷家站桑乾河在西南保安  
州新城卽此紀要桑乾河州西南四十里洋河州西  
南十五里並本此經一十里別本作一十五里

又東入宛平縣境爲蘆溝河至看丹口分爲二派其一  
東流出通州高麗莊入白河

桑乾河經懷來西南自居庸關西沿河口入長城行  
山中經昌平州及宛平縣西境曲直二百餘里又東  
南出蘆溝橋下爲蘆溝河亦曰小黃河明志河初過  
懷來束兩山閒不得肆至都城西四十里石景山之

東地平土疏衝激震盪遷徙弗常元史名蘆溝曰小  
黃河以其流濁也今名永定河自良鄉東南流入固  
安境明志宛平桑乾河出蘆溝橋下又東南分爲二  
一至通州入白河一至武清小直沽合衛河入於海  
通州西有通惠河西南有渾河卽桑乾至州東張家  
灣俱合於白河又云東安南有鳳河卽桑乾分流南  
入三角淀滹縣有滹河一名新河東入於白河卽蘆  
溝之下流綜核衆說永定河舊瀆於蘆溝橋下東分  
一支由南苑海淀流出經通州西南至張家灣東北  
合通惠河入白河後又徙從滹縣村南爲滹河東入

白河後又南合鳳河至武清東南爲安沽港河入三角淀提綱鳳河元時渾河故道明時渾河南注奪琉璃河經流下達霸州其東流一道不復相通遂名鳳河經云出高麗莊入白河蓋猶據明初舊瀆矣

其一南流逕固安至武清縣小直沽入于衛河

今永定河自固安北折東南經永清北霸州東北東安南合中亭河過三角淀經武清東南合子牙河又東至西沽入白河又東南合運河明志成化七年霸州知州蔣愷言城北草橋界河上接渾河下至小直沽注於海永樂閒渾河改流西南經固安新城雄縣

抵州屢決爲害近決孫家口東流入河又東抵三角  
淀小直沽乃其故道請因其自然之勢修築堤岸永  
定河南流一支明初自固安入霸州至草橋合易水  
爲界河東經三角淀入小直沽後決固安故城村西  
南至茨村奪琉璃河入新城東境雄縣東北境轉流  
入霸州經城南合玉帶河爲會同河後又決孫家口  
徙歸故道乾隆府廳州縣圖志新城故渾河在縣東  
三十里自明以來遷徙無定 本朝順治十年水大  
漲由固安之故城村南決汎濫縣之東北下入雄縣  
康熙十一年復歸固安畿輔地圖記渾河達固安縣

境南分一支入新城縣東轉流入霸州一支順流又分彘復合流入霸州遶城東南名通濟河流入玉帶河記所據乃康熙二十三年河道新城一派尙是通流至三十七年開永定新河故城諸口始盡湮塞提綱云固安永清霸州時苦泛溢康熙三十七年始由良鄉之張家莊至東安之郎神河重開一道使昔之泛決固安以西與清水河合而南至新城霸州者今遷流入東由固安永清之北引流直出柳彘口三角淀以達西沽築長堤南北兩岸二百餘里遏其南趨使不與清水諸河會賜名曰永定河水患稍息今固

安南有引河分堽復合至霸州北又復分流經城東  
西入會同河卽通濟河蒼瀆經云逕固安至武清縣  
小直沽亦據明初言之

今水經注卷三

今水經注卷四

錢塘吳承志纂

吳興劉承幹校

北水

淮水源發河南南陽府唐縣東南一百八十里桐柏山  
其支岡有水潛流三十里東出大復山

淮源出今桐柏縣西三十里桐柏山東南流曲折經  
隨州北界出山司折而北循翠屏山麓經縣東折東  
流過信陽州始出重山明志桐柏本唐縣之桐柏鎮  
成化十二年十二月改置縣東有桐柏山淮水所經



又東有大復山西北有胎簪山淮水所出大復胎簪  
皆桐柏支峰王氏鳴盛蛾術編云胎簪最在西北大復  
最在東桐柏乃其總名說文注前志平氏下曰禹貢  
桐柏大復山在東南淮水所出水經曰淮水出南陽  
平氏縣胎簪山東北過桐柏山按桐柏大復以四字  
爲山名應劭注云復陽縣在桐柏大復山之陽是也  
後世地志析爲二山乃非是禹貢祇云桐柏省言之  
也水經所謂胎簪亦卽桐柏耳作水經者別爲二亦  
非也注說胎簪與王符合說大復不同洪适隸釋載  
延熹六年桐柏淮源廟碑云淮出平氏始於大復潛

行地中見於陽口立廟桐柏據碑桐柏大復漢時自  
析爲二山班應所云以大名冠小名非四字連合爲  
目段氏失考大復爲淮水上源所出其山當在今桐  
柏山西北水經淮水出胎簪山東北過桐柏山桐柏  
據今翠屏諸山而言胎簪卽今桐柏大復似卽今所  
謂胎簪注自潛行地下三十許里東出桐柏之大復  
山南謂之陽口自下趙釋謂有奪字證以碑文正文  
當作自大復山潛行地下三十許里東出桐柏之南  
謂之陽口則大復爲胎簪信矣紀要大復山在桐柏  
縣東三十里沿俗本水經注之誤大復在今縣東三

十里則在翠屏以東淮水至此已成流數十里焉得  
云潛行始出王氏亦未之審經說俱仍舊文桐柏山  
明季入桐柏縣系之唐縣亦襲一統志而失改

至新蔡縣南汝水從西北來入之

汝水說具下經明志汝陽北有汝水源出天息山東  
流入境過新蔡東南入淮此故汝也又云西平北有  
汝水源出縣西南雲莊諸石二山自元末塌斷故汝  
而此水遂爲汝源嘉靖九年復塞改爲洪河之上流  
遂平西南有查牙山其東南相接者曰馬鞍山又西  
有洪山龍陂之源出焉自西平縣雲莊諸山之水旣

塞遂以此爲汝源此今汝也汝水自元至正中改流  
至明季凡三易提綱分南汝北汝北汝水自上蔡北  
境流經商水北合潁水南汝自上蔡南境經汝陽南  
至新蔡東南會洪河東經固始西北境入淮支津又  
東入潁州至阜陽南照鎮亦入於淮乾隆府廳州縣  
圖志西平汝水卽濰水潁水遂平汝水古潁水濯水  
漢志水道圖說云舞陰中陰山觀水所出今遂平縣  
縣南汝水之源出中陽山

至壽州西北潁水入之又東淝水入之

淝水源出宿州  
龍山湖東流至

懷遠縣  
入淮

壽州境內有二淝水一曰西淝河首受渦水紀要云  
蔡頴以東積水所匯引而爲河自壽州南境分支流  
入太和至州西入淮明志卽夏肥水也一曰南淝河  
古東肥水源出六安州東南龍穴大尖二山分流至  
合肥西北合而爲一北經北鑪鎮合清洛澗水折西  
北至州東入淮二水俱在渦河之西渦水以東別有  
淝水源出宿州西南龍山湖西南合一水折東南至  
懷遠東北鳳陽西北之沫河口入淮明志名此爲北  
肥水同治輿地圖作東淝河經據水經注敘淝水於  
渦水之上宜據西南二淝河注以北淝水說之誤

至懷遠縣渦水入之渦水源出河南太康縣自黃河東流逕蒙城縣北沿懷遠縣東北入

淮于

明志太康北有渦水自通許縣流入下流至南直懷

遠縣入淮通許西南有故黃河嘉靖六年御史戴金

言黃河入淮之道有三自中牟至荆山合長淮曰渦

河自開封經葛岡小壩丁家道口馬牧集鴛鴦口至

徐州小浮橋口曰汴河自小壩經歸德城南飲馬池

抵文家集經夏邑至宿遷曰白河宏治閒渦白上源

堙塞徐州獨受其害白河今白坡河渦河卽此水舊

渠於扶溝東受狼湯渠後改受蔡河金明昌中河決

陽武南入太康因首受黃河明宏治中又改受中牟  
決河注云源出太康據金元言也今太康北有姬家  
河下流合惠濟河至柘城南合渦河卽明時渦水故  
瀆今渦河在太康南上流爲燕城河又上流爲青岡  
河出通許東北與舊道不同惠濟河卽周家河說具

下經

淮水又東至鳳陽府北境濠水入之濠水有二源東源出鳳陽府舊城南

六十里鐘乳山西南源出府南八十里鏤錡山至昇高橋合流逕府舊城西南有石絕水謂之濠梁又東南逕新河口入于淮

濠水出今鳳陽東南濠塘山北流經濠梁驛至臨淮

故城西北入淮濠塘山卽鐘乳山也水經注有二濠  
水一出陰陵縣之陽亭北東北流逕鍾離縣西又屈  
而南轉東逕其城南又北歷其城東逕小城而北流  
注於淮卽此濠水一出莫邪山之東北溪溪水西北  
引瀆逕禹墟北又西流注於淮詳其地形乃今懷遠  
南之天河李氏兆洛養一齋集上孫制府書云天河  
斜長四十餘里入淮故道舊由葫蘆繫經黃水淤塞  
禹村岡北天河南岸有水溝挑引河一道長不過四  
里許已接天河抵淮禹村岡卽古禹墟元和志載陽  
亭水謂之東濠水出鍾離縣南濠塘山東北入淮與



注地形符合莫邪山爲西濠水下流北入淮於西流  
之說不相應今天河東有龍子河東西二源西源與  
天河隔嶺東北流合東源北入淮疑志所云西濠水  
據此三水各自爲派不相通合注云東西二濠至昇  
高橋合流未詳乾隆府廳州縣圖志西濠水源出鳳  
陽縣南利山西北流逕懷遠縣南塗山之麓北入淮  
東濠水源出縣南濠塘山北流合西濠水南濠水注  
淮圖志西濠水謂天河南濠水謂龍子河分別甚明  
云東濠水合二水注淮亦所不解淮水旣納濠水東  
北流經五河南合滄河

又東北入泗州至清河口泗水入之又東邗溝南入焉  
邗溝自大江至揚子鎮南爲伊婁河又自大江由儀真縣南爲獅子河東北流逕揚州城東南北通射陽湖爲邗溝入淮

泗州故城在今盱眙北一里乾隆府廳州縣圖志云

本朝順治中陷于淮乾隆四十二年裁虹縣以州

移治之明志淮水經泗州城南稍東汴水入焉過龜

山麓益折而北會洪澤阜陵泥墩萬家諸湖東北至

清河南會於大河今自盱眙西北淮河口東至寶應

山陽西高堰五壩通爲洪澤湖汴水亦於臨淮口入

湖湖東北爲臨清堰亦曰臨黃堰卽古清口淮水至

此緒而不流明隆慶三年高堰大潰決黃浦入淺湖隄淮自山陽東入海萬厯元年給事中鄭岳言自嘉靖四十四年河水大發淮口出水之際海沙漸淤今且高與山等明年又決高家堰總漕侍郎吳桂芳言黃強淮弱南徙而灌山陽高寶諸湖請急護湖隄給事中湯聘尹議請導淮入江會河從老黃河奔入海淮得乘虛出清口未幾老黃河復塞六年總河都御史潘季馴築高堰堤起武家墩經大小澗阜陵湖周橋翟壩長八十里又以淮水北岸有王簡張福二口洩入黃河築堤捍之使淮無所出黃無所入全淮畢

趨清口會大河入海八年給事中王道成言黃河未  
漲淮泗閒霖雨偶集清口已不容洩十九年淮水溢  
泗州給事中張貞觀議闢清口沙且分黃河之流於  
清口上流旣而淮水決張福堤二十三年又決高郵  
中堤及高堰高良澗給事中吳應明言今清口外則  
黃流阻遏清口內則淤沙橫截強河橫灌上流約百  
里許淮水僅出沙上之浮流宜拆張福堤而堤清口  
使河水無南向二十四年總河尙書楊一魁請分黃  
導淮乃建武家墩經河閘洩淮水由永濟河達涇河  
下射陽湖入海又建高良澗及周橋減水石閘以洩

淮水一由盂河入涇河一由草子湖寶應湖下子嬰  
溝俱下廣洋湖入海又挑高郵茆塘港通邵伯湖開  
金灣下芒稻河入江事具潘季馴河防一覽及明志  
詳諸說明時淮水已不出清口 國朝康熙二十三  
年河道總督靳輔以清口淤淺於上游河南岸開減  
水河自徐州毛城鋪至睢甯龍虎山爲閘壩九引河  
流由睢溪口靈芝孟山等湖入洪澤湖以助淮二十  
五年修築高堰立轉水墩分水七分出清口三分爲  
回溜東南入運河淮水遂與南旺汶水相似尙書地  
理今釋淮水出清口與黃河會東則刷黃河以入海

南則入運河歷揚州府寶應縣高郵州抵江都縣入揚子江今釋所據卽輔奏乾隆十六年折轉水墩立束清禦黃二壩淮水專以濟運不復刷黃嘉靖九年移禦黃壩於北退束清壩於南二十三年增築二壩爲重門壩之爲制以時開塞道光六年創戽水通舟之法於是禦壩常閉淮水與河涓滴不相通注劉氏文淇揚州水道記卷末載吳氏文鎔書云頃歲漕運用灌塘法河與淮不相見河獨入海淮則入江以入海又情事之稍異是全淮俱入於江矣今河流北徙禦黃諸壩已廢不用惟束清壩尙存淮水故道淤絕

不能復歸光緒八年漕河總督黎培敬開清江以下  
舊渠微如溝澗不可方舟江蘇學政夏同善議濬雲  
梯關海口言者皆以爲今昔異形大學衍義補云河  
淮合二瀆爲一今河復入濟淮水又散洩入江四瀆  
直亡其二運口亦與古不同說具下經注文重出當

刪

淮水又東滌迴淮安府城北五里又東泚水入之過安  
東縣東入于海

春秋大事表云淮水經淮安府城北去城五十里而  
近與今地合紀要本此經作五里泚水今合鹽河東

流至淮河口入海卽水經注游水故道宋時開通漣  
河南與淮會明志沭陽東南有沭水自山東郟城縣  
流入下流爲漣水安東西南有漣河自西北來東南  
流入淮通漣河故道在安東西南今已堙

汝水源出河南汝州天息山

汝水出嵩縣西南山有二源提綱云南源曰播鼓山  
東北流北源曰老君山東流數十里合而東北經嵩  
縣南境之伏牛山北卽古天息山也漢志汝南郡定  
陵高陵山汝水出新鄴注云水經汝水出梁縣勉鄉  
西天息山東南過郟縣南定陵縣北郟縣北上蔡縣



西平輿縣南至原鹿縣入淮自元時塌斷故汝今咸以出天息之水爲北汝矣南汝自泌陽縣北山出而東流與水經不侔但天息山與定陵東西相去數百里汝水不應原出定陵故說者以天息之原畫水經之水定陵之原畫漢志之水疑莫能定焉說文解字汝水出宏農盧氏還歸山卽天息也此北汝之原淮南子汝出猛山注猛山一名高陵山此南汝之原按漢志定陵續志已省入他縣今無以定其所在水經注言高陵猛山大孟山還歸山燕泉山並異名則古汝水無別源也

東流過郟縣南又東南澙水合沙河入之澙水源出魯山縣西堯山  
流至葉縣入沙河河源出桐柏山東流合三里河入汝水過襄城縣又東南過郟

城縣北

今汝水自伊陽流經汝州郟縣至襄城東南八十里  
橫梁渡沙河自西北來注之沙河卽古澙水亦謂之

泜水源出魯山西沒大嶺流經縣東合達老河過寶

豐南至葉縣東南合輝河輝河出縣西南西唐山古

昆水也流經縣南又東南合沙河沙河東南入汝汝

水自納沙河以下通得沙名東南經舞陽東北境至

郟城縣城南合澧河澧河卽醴水源出雒衡山提綱

云首引舞陽西界魯山南界裕州北境之三里河水  
三里河本南流入唐河者於山中分其支津東流出  
山經葉縣南境舞陽北境又至鄆城南與沙河會澧  
河所合沙河卽汝水矣經云澧水合沙河入汝沙河  
似據輝河而言注澧水流至葉縣入沙河與今輝河  
地形正合又云沙河源出桐柏山東流合三里河誤  
以澧河當之澧河上源爲三里河三里河南流入裕  
州折而西爲趙河又南流注唐縣合泌水爲唐河又  
南合澧水轉西流入消唐縣澧水出桐柏山與雒衡  
山之澧名同實異注因三里河牽合爲一遂謂桐柏

山水逆流出裕州爲沙河入汝水也下經嘉陵江注  
泌水源出泌陽縣東四十里桐柏山東流爲淮西流  
爲泌泌與澧亦誤合爲一說具本經過襄陽城四字  
當移置澧水之上鄧城縣北北字亦當從明志作南  
又東南入汝甯府境逕汝陽上蔡又東南逕新蔡東流  
入于淮

汝水本自鄧城南入西平今竭斷爲二南汝已說具  
上經北汝自大灑水故瀆東經上蔡北西華南至商  
水北沙河口合潁水明志鄧城南有沙水亦曰大灑  
水乾隆府廳州縣圖志大灑水卽汝水支分古灑水

亦曰瀆水爾雅云汝有瀆瀆瀆皆聲相近汝之別矣今北汝水所經正汝水別渠也

潁水有三源左源出登封縣東二十五里陽乾山中源出嵩縣少室山右源出少室南溪

水經注潁水有三源右水出陽乾山之潁谷中水導源少室通阜左水出少室南溪經仍舊文易其左右陽乾山在登封東二十五里去中源遠至六十餘里又少室以東別有數源於三說亦不合明志改作西南是也同治輿地圖列潁水三源中右二源各有兩源右源一出岳高山東一出峻嶒坡西孰爲陽乾正

源無以定之漢志陽城陽乾山潁水所出說文云潁  
水出潁川陽城乾山東入淮潁水出潁川陽城少室  
山東入潁少室之水漢時謂之潁水水經始云潁水  
出潁川陽城西北少室山楊齊宣晉書音義引說文  
因作陽城少室陽乾山陽乾爲少室支峰魏晉以後  
之說固如此矣

流入鈞州界又東南過許州又東南過臨潁扶溝二縣  
鈞州今禹州明志禹州元曰均州萬曆三年四月避  
諱改曰禹州顧氏棟高春秋大事表水經注潁水逕  
陽翟故城北陽翟本元鈞州治明洪武初省入州潁

水至州東分爲二派一東北出經新鄭南長葛西南  
過許州東北至臨潁東一南出爲石梁河經襄城東  
北過許州東南至臨潁北二水復合爲一又東南入  
西華界

又東南洧水東流注之

洧水源自密縣東至新鄭縣會  
溱水爲雙泊河至西華縣入潁

溱水源自密縣又東過西華縣北

潁水右會渚河過史湖口又東經縣南折東南至商  
水北沙河口與北汝水合又東稍北至周家口賈魯  
河自扶溝合雙泊河北來注之賈魯河卽古蔡河說  
具上經雙泊河源出密縣西南陽城山曰洧河至新

鄭西北合溱水溱水出密縣東合洧河爲雙泊河說  
文注云今洧盛溱澗雙泊河流經長葛北至鄆陵西  
北舊折東南流入西華境一統志云洧水本至西華  
入潁宋時導之自扶溝入蔡乾隆府廳州縣圖志云  
今有史家河在西華西南卽洧水之餘流也史家河  
正洧水自習城入潁故瀆經云潁水過扶溝縣又東  
南洧水東流注之又東過西華縣北皆承水經注舊  
說唐時西華已移置潁水之北元和志西華潁水在  
縣南二十里

又南過太和縣北又東南過潁上縣北又東南入于淮



潁水既合賈魯河東南爲沙河過淮甯南沈邱北蔡  
河入焉蔡河源出淮甯北卽故蔡渠之餘流也南合  
七里河至新安集入沙河沙河又東南入太和境過  
縣南合柳河茨河又東南至阜陽北與過河會過河  
本首受沙河自淮甯南分支提綱云過河自商水東  
南境南流有支渠西達縣南境與西北來之汾河合  
其正流東南經沈邱縣西北境汾河自西北來東南  
流經項城縣北而東會焉又東南經沈邱縣城南又  
東南入江南界今過河上流已湮首受汾河沙河旣  
合過河又東南過潁上北又東南至正陽關東北入

淮明志潁州北有潁河自河南沈邱縣流入洪武二十四年黃河決於河南由陳州合潁逕太和縣又逕州城北又逕潁上縣至壽州全入于淮永樂九年河復故道宣德正統成化正德閒河潁時通時塞俗亦稱潁爲小黃河紀要云明朝大河決塞不一潁蔡諸流盡失故道其可辨者無幾矣沙河古新溝水太和古新陽東南境地經云逕太和北亦據水經文而誤改

泗水源出山東兗州府泗水縣東五十里陪尾山四泉並發故以爲名

說文泗水受沛水東入淮從水四聲元和志泗水出泗水縣東五十里陪尾山其源有四四泉俱導因以爲名經說本之漢志魯國卞泗水西南至方與入沛泰山郡蓋臨樂于山洙水至蓋入池水圖說云泗水蓋今泗水縣北境嶮河西南流至縣西境及縣西之泗水西南流至魚臺縣北境入昭陽湖志文入沛當作入沛渠蒍澤自沛分出故曰沛渠也洙水蓋今泗水縣俗以爲泗水之源者西北流至縣西境與嶮河合志文至蓋當作至卞入池水當依水經注引作入泗今泗水乃古洙水則所謂四泉俱導因以爲名者

妄矣山海經泗水出魯東北杜預春秋釋例作涑水  
出魯國東北涑泗二水以下流互受而得通稱張華  
博物志泗水出陪尾陪尾卽臨樂因涑水通稱泗水  
故又以涑源爲泗源也

至濟甯州分流南北北流謂之北清河南流謂之南清  
河

清河本濟水之名錐指云濟水自東平以下唐人謂  
之清河至宋又有南北清河之名南清河則泗水北  
清河則濟瀆也南渡後北清河又有大小之分宋金  
史志言河自梁山灤北合北清河北清河卽大清河

元開會通河引汶絕濟自壽張至臨清北清河與大清河始分爲二經云泗水南流謂之南清河與舊說相應北流謂之北清河似合汶泗爲一兩清河今通名運河

北清河亦名會通河在濟甯州南自濟甯分水關至東昌府臨清關凡四百餘里自濟甯則引泗洸及徂徠諸山谷水注之至沙灣則引黃河支流自金龍口者合之自兗州府陽穀縣入東昌府境至府城東南北達臨清入于衛河

明志會通河資汶洸泗水及山東泉源自南旺分水

北至臨清三百里地降九十尺爲閘二十有一南至  
鎮口三百九十里地降百十有六尺爲閘二十有七  
其外又有積水進水減水平水之閘其後開泃河二  
百六十里運舟不出鎮口與黃河會於董溝永樂四  
年成祖命平江伯陳瑄督轉運一仍由海而一則浮  
淮入河至揚武陸輓百七十里抵衛輝浮於衛九年  
二月乃用濟甯州潘叔正言命尙書宋禮侍郎金純  
都督周長濬會通河會通河者元轉漕故道也元末  
已廢不用洪武二十四年河決原武漫安山湖而東  
會通盡淤至是復之由濟甯至臨清三百八十五里

引汶泗入其中泗水至兗州城東合於沂汶河經甯陽北峒城西南流百餘里至汶上其支流曰洸河出峒城西南流三十里會甯陽諸泉經濟甯東與泗合一元初畢輔國始於峒城左汶水陰作斗門導汶入洸至元中又分流北入濟由壽張至臨清通漳御入海南旺者南北之脊也自左而南距濟甯九十里合沂泗以濟自右而北距臨清三百餘里無他水獨賴汶禮用汶上老人白英策築壩東平之戴村遏汶使無入洸而盡出南旺南北置閘三十八又開新河自汶上袁家口左徙五十里至壽張之沙灣以接舊河又





魚臺運河今自獨山湖東南行過縣東北境經滕縣  
西至沛縣東韓莊入嶧縣境東南合西泇河注邳州  
經所云乃泗水故道泇水說具上經韓愈昌黎集有  
泇泗交流贈張僕射詩其時泇水尙至徐州城角會  
泗後徙從泗州入淮李翱來南錄云泗州見刺史假  
舟轉淮上河如揚州庚申下泇渠是元和初已改流  
矣錐指云泇水從夏邑永城宿州靈璧虹縣至泗州  
兩城閒入于淮宋時東南之漕率由此以達京師南  
渡後漸堙元泰定初河行故泇渠仍於徐州合泗水  
至清口入淮而泗州之泇口遂廢今泗水不至呂梁

河所行故瀆亦淤成平陸

泗水又南至宿遷縣睢水入焉

睢水有二一在陳留縣東北四十里東逕睢州

達甯陵縣一在夏邑縣南二十里逕永城縣合沙白水過宿州城二十里逕靈璧縣北入徐州境城南二十里

東流逕睢甯縣界又東北至宿遷縣入泗水

紀要云睢水汴水之支流也今自開封府陳留縣東

北四十里與汴河分流東南流經杞縣北又東經睢

州北及甯陵縣之南又東經歸德府城南又東至夏

邑永城縣南而入徐州之碭山蕭縣界過縣南又東

歷徐州南境宿州北境過靈璧縣北又東出睢甯城

北至宿遷縣東南而合於泗水今為大河經流注分

陳留夏邑水爲二其時歸德城南之水已不通流也  
明志宏治三年濬睢河自歸德飲馬池經符離橋至  
宿遷以會漕河宏治閒所濬亦至飲馬池而止今睢  
河首受洪溝巴溝兩河洪溝河出虞城東經夏邑東  
北至碭山南爲龍溝河經蕭縣西合齊村河至徐溪  
口與巴溝河會巴溝河出歸德東蔡家道口曰白坡  
河合毛家河至夏邑西南合二小河爲三汜河過永  
城東北入蕭縣境會龍溝河兩河旣合爲肥河東南  
經宿州靈壁北至睢甯東南歸仁集折南流入洪澤  
湖歸仁集以東故道已堙白坡河卽注所云沙白水

其上流舊有盃河自歸德東北上通甯陵曰沙白渠  
今爲北沙河南流入澮河陳留睢水今入渦河乾隆  
輿地圖祥符南有睢河首受賈魯河東南流過陳留  
爲周家河卽故睢水之餘流入徐州境以下有奪字  
泗水又南至清河縣西北之三汜河口分爲大小二清  
河南達于淮

運河自邳州經宿遷合東泲水過桃源北眾興集至  
清河北漁溝集分二派爲新舊鹽河又南至楊家莊  
口入淮會通河水道記云初運河於徐沛東張莊入  
黃河去清江浦運口遠運船歷黃河險二百里康熙

二十七年就黃河之北岸開中河漸移而東南曰仲  
家莊口入對岸清口行黃河止七里四十七年以仲  
家莊口挾駱馬湖諸水逼黃河南倚居清口上游恐  
病清口乃改而東南爲楊家莊口與清口相直運河  
經故黃河之東與泗水舊道不同紀要云清河過宿  
遷縣南又東經桃源縣北至淮安清河縣西北三十  
里三汊河口分爲大小二清河又南達於淮謂之清  
口亦曰泗口亦曰淮口本之此經清河舊城在淮水  
北今徙治淮南崇文局本兩清河俱誤作濟河

今水經注卷四